



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Especyal nga Isyu
Disyembre 26, 2008
www.philippinerevolution.org

Pabakuron ang Partido kag pasanyugon ang paghimakas sang pumuluyo sa pagsaulog sang ika-40 anibersaryo sang pagkatukod

Mensahe sang Komite Sentral
Partido Komunista sang Pilipinas

Bug-os ang kalipay nga ginasaulog naton subong nga adlaw ang ika-40 anibersaryo sang pagkatukod sang Partido Komunista sang Pilipinas (PKP) bilang abante nga destakamento sang sahing mamumugon nga Pilipino sa teoritikong ubay sang Marxismo-Leninismo-Maoismo. Kwarenta ka tuig na ang nakaligad, gintukod naton liwat sa bag-ong pundasyon ang sadto anay nga Communist Party of Philippine Islands (CPPI).

Sa masadyahon nga okasyon nga ini, kami sa Komite Sentral sang PKP nagasaludo sa tanan nga kaupod sa tanan nga organo, yunit kag patag sang hilikuton sang Partido, tanan nga Pulang kumander kag hangaway sang Bag-ong Hangaway sang Banwa, tanan nga magkaalyado nga pwera sa National Democratic Front of the Philippines, tanan nga lider kag upisyal sang mga lokal nga organo sang demokratikong gubyrno sang pumuluyo, tanan nga aktibista sa kahublagang masa kag sa malapad nga masa sang pumuluyong Pilipino.


Ginatamyaw namon ang tanan nga kadre kag katapu sang Partido sa tanan nga natipon kag bag-ong mga kadalag-an sa hilikuton pang-ideolohiya, pangpulitika kag pang-organisasyon kag ang tanan nga rebolusyonaryong pwera kag pumuluyo sa mga dungganon nga

kadalag-an sa pagpasulong sang bag-o nga demokratikong rebolusyon paagi sa malawigan nga inaway banwa kag pagpakighiliugyong prente batuk sa dumuluong nga monopolyo kapitalismo, lokal nga pyudalismo kag burukrata kapitalismo.

Indi magsulong ang rebolusyonaryong handum sang pumuluyo kon wala ang prinsipyang pangindugan, militansya kag pasensya sang

bug-os nga Partido sa rebolusyonaryong paghimakas. Naangkon naton ang mga kadalag-an paagi sa pagtinguha, matutom nga paghimakas kag mga sakripisyo. Dapat naton nga ihatag ang pinakamataas nga pasidungog sa aton mga rebolusyonaryong martir kag baganihan, lakip ang yadtong nagkalamatay sa patag-awayan kag mga naghalad sang ila kabuhi sa lain-lain nga rebolusyonaryong hilikuton sa guwa sang patag-awayan.

Kada tuig, naga-pabugal ang rehimeng US-Arroyo nga lubos sini nga pagadugmukon, estratehikong lutuson ukon pia-



ngon ang armado nga rebolusyonaryong kahublagan sang pigos kag ginahimuslan nga pumuluyo. Sa kamatuoran, nagsabwag ini sang pinakamapintas nga atake batuk sa minilyon nga pumuluyo sa mga prenteng gerilya kag sa mga di-armado, lakip ang mga lider kag katapu sang ligal nga organisasyong masa sang mga mamumugon, mangunguma, pamatan-on kag kababainhan, mga manunudlo, tawong-simbahan, abugado, peryodista, huwes kag tanan nga iban pang personahe nga nagapakamaut kag nagakontra sa mga garuk sini nga polisiya kag krimen.

Madeklarar naton subong nga lubos nga napaslawan ang ginatawag Enhanced National Internal Security Plan kag Oplan Bantay Laya I kag II. Nagdabuk lamang ang mga ini sa pumuluyo nga pasingkion ang armadong rebolusyon kag iban pa nga porma sang paghimakas. Nagbaskog ang pumuluyo kag mga rebolusyonaryong pwersa durante sang militanteng paghimakas. Indisila dapat maghalog, kundi, dapat nila pasan-yugon ang tanan nga porma sang paghimakas.

Isaulog naton sa bilog nga 2009 ang ika-40 anibersaryo sang pagkatukod sang aton Partido paagi sa paglunsar sang mga aktibidad nga pang-edukasyon, pangpulitika, pangkultura kag iban pa agud isulong kag dalhon ang rebolusyon sa bag-o kag mas mataas nga halintang. Tinguhaon naton nga malabot ang daku nga lumpat pasulong sa tanan nga porma sang rebolusyonaryong paghimakas.

Dapat naton tigayunon sang mapagsik ang edukasyon kag paghanas sang mga kadre kag katapu sang aton Partido sa Marxismo-Leninismo-Maoismo kag sa bag-o nga demokratisong rebolusyon. Dapat pamunuan


sang aton Partido ang malapad nga masa sang pumuluyo paagi sa pagpukaw, pag-organisa kag pagpahulag sa ila. Dapat naton uyatan sang hugot kag epektibo ang mga armas sang armadong paghimakas kag nagahiliugyong prente. Dapat pabasugon pa gid naton ang organisasyon sang Partido paagi sa pagpadasig sa pagrekrut sang mga kandidato nga katapu sang Partido halin sa rebolusyonaryong kahublagan masa kag pagtukod sang mga sangang Partido sa mga komunidad, pabrika, talmnan, eskwelahan kag iban pang institusyon.

Dapat pasanyugon ang armadong paghimakas kadungan sang reporma sa lupa, pagbungkag sa dalagku nga empresa nga nagapangagaw duta kag pagpalapad kag pagpadalum sang baseng masa. Dapat pasanyugon ang mga lokal nga organo sang gahum pangpulitika kag mga organisasyong masa. Dapat maglunsar sang mga kampanyang masa para pataason ang lebel sang kamuklatan sang pumuluyo sa dalagku nga isyu, pataason ang produksyon, isulong ang hilikuton sa ikaayong lawas, pasanyugon ang paghanas sang mga yunit milisya kag mga yunit sa pagdepensa kag malaparan nga tigayunon ang mga pangkultura nga aktibidad. Dapat pauswagon ang mga prenteng gerilya pakadto sa pagtukod sa relatibo malig-on

nga baseng purok. Dapat tukuron ang lain-lain nga porma sang alyansa sa balayon sang anti-imperyalista kag antipiyudal nga pagpakighiliugyong prente.

Tuman ka paborable ang kahimutangan para isulong ang rebolusyonang Pilipino. Ang Numero Uno nga imperyalistang gahum nga nagapigos kag nagahimulos sa pumuluyong Pilipino kag pumuluyo sang kalibutan napun-an sang wala kapares nga krisis pang-ekonomya kag pangpinansya nga mas malalap sa Great Depression¹ sadtong 1929 kag nagaagi sang grabe nga pagkalutos sa gerang agresyon sini sa Iraq kag Afghanistan. Nagatalom ang mga kontradiksyon sa tunga sang mga imperyalistang gahum kag mga pigos nga pumuluyo kag pungsod, sa kubay sang mga imperyalistang gahum kag sa tunga sang monopolyong burgesya kag sahing mamumugon sa mga imperyalistang pungsod.

Madasig nga nagalala ang permanenteng krisis sang malakolonya kag malapyudal nga nagaharing sistema sa Pilipinas gani labaw sa san-o pa man indi na makahari sa daan nga paagi ang dalagku nga kumprador, agalon nga mayduta kag mga ahente nila sa pulitika. Ang malapad nga masa sang pumuluyo hugot nga nagahandum sang rebolusyonaryong pagbag-o kag nagasalig sa Partido Komunista sang Pilipinas bilang nagapamuno nga pwersa sang rebolusyon. Ini ang Partido nga wala kataka nga nagabato sa lokal nga nagaharing sistema, sa imperyalistang sistema sang pagpandambong kag pagpanggera kag nagatib-ong sa mga handum sang pumuluyo nga Pilipino para sa pungsodnon nga kahalwayan kag demokrasya kag para sa sosyalista kag komunista nga palabutan.



I. Wala pa sang kapares nga krisis sa ekonomya kag pinansya

Sa sulod sang masobra duha ka tuig, nasaksihan naton ang nagahana nga lubos nga pagdugmok kag lubos nga pagsamad sang maskara sang “hilway nga merkado” sang monopolyo kapitalismo kag ang dalayon nga pagkabangkarote sang polisiya nga “neoliberal nga globalisasyon.” Pero padayon nga nagabinutig kag nagapahambog ang mga lider sang US kag iban pang pungsod nga imperyalista kag mga papet nga estado bahin sa kuno “malig-on nga salandigan sang tagsa-tagsa ka ekonomya”. Sining karon lang sila napwersa sang mga sirkumstansya nga akuon nga ang US kag ang pangkalibutanon nga sistemang kapitalista ginabunalan sang krisis pang-ekonomya kag pangpinansya nga pinakamalala halin sadtong *Great Depression*¹

Matapos maglupok ang bukal sang *hightech*² sa balaligyaan sang mga sapi (*stock market*) sadtong 2000, nga grabe nga nagadalasa sa mga pondo pangpensyon kag sa mga tinago nga indi magnubo sa 40% sang mga pamilyang Amerikano, ginbalay sang mga awtoridad kag mga institusyon pangpinansya sa US ang bukal sa pabalay (“*housing bubble*”) agud ganyaton ang mga Amerikano nga mangutang sa pabalay sa manubo nga interes kag papatihon sila nga sa pagtaas sang balor sang mga balay makapangutang pa sila liwat kag makabakal sang imported nga produkto tub-tub sa gusto nila bisan wala sila sang nagakaigo nga kita ukon trabaho. Wala napun-an sang ginpansiyog nga *hightech* nga produksyon sang mga kagamitan militar sa idalum sang rehimeng Bush ang madugay na nga pagluya sang industriya, pagsentro sa serbisyo kag pinansyalisasyon sang ekonomya sang US.

Nagsugod nga maglupok ang bukal sa pabalay sadtong 2006. Nagapadaku ang numero sang mga pamilya sa US ang indi na makahulog sa ila utang bangud ginpataas ang interes agud kontrahon ang implasyon. Bulan-bulan nagalapnag ang epidemya sang pagkaremate sang mga balay. Ginahayag sini

ang wala renda nga ispekulasyon kag ginbunga nga pagkaputo sang pinakadaku nga bangko sa pamuhunan kag institusyon pangpinansya kag iban pa nga mayor nga mga bangko nga komersyal (Bear Stearns, Lehman Brothers, Morgan Stanley, Merrill Lynch kag Goldman Sachs), sang pinakadaku nga kumpanya sa seguro (ang American International Group), mga empresa nga ginapondohan sang gubyrong pederal (Federal National Mortgage Association ukon Frannie Mae kag ang Federal Housing Finance Agency ukon Freddie Mac), kag iban pa.

Tuga sang *mortgage meltdown*³, nahayag nga ang mga institusyon pangpinansya sa US nakapadala sa Europe kag iban pang kontinente sang mga hilo nga produktong pangpinansya pareho sang papeles nga mga di mabayaran nga utang sa pabalay nga may kon anano nga makahalam-ot nga mga ngalan pareho sang *mortgage-backed securities, collateralized debt obligations, structured investment vehicles, credit default swaps*⁴ kag iban pa. Nagbunga ini sang magkasunod nga pagtibusok pinansyal, lakip ang pag-istrikto sa pagpautang sang mga bangko sa kada isa kag sa balaligyaan sang kwarta kag ang pagtibusok sang balaligyaan sang mga

sapi, indi lamang sa US kundi sa bilog nga kalibutan. Una nga ginsalbar sang US kag iban pang imperyalistang pungsod ang mga bangko kag iban pang institusyon pangpinansya gamit ang pondo nga pangpubliko sa baylo nga ang pumuluyo nga ginabiktima sang mga monopolyo kapitalista sa pinansya.

Matuod nga ang *mortgage meltdown* ang nagpaigrab sa subong nga krisis sa pinansya. Pero mas madalum pa ang ugat sang krisis nga ini. Imbolbado diri ang wala untat nga pagtinguha sang monopolyong burgesya nga nagpuga sang sobra nga balor halin sa sahing mamumugon, labi pa nga pugaon ang superganansya paagi sa pagpanubo sang panuwelduhan kag sa sini indi hungod nga pakitiron ang balaligyaan sa pagpaga-may sang kita sang sahing mamumugon kag sang epektibong demanda para sa mga produkto. Bunga sini ang krisis sang sobrang produksyon kag ang siklo sang “pag-uswag kag pagtibusok.” Labi pa ini nga ginapalubha kag ginapagrabang pagtinguha sang US nga magpangita kag maggamit sang mas barato nga pagtrabaho sa iban nga pungsod kag maghatag sang akomodasyon sa pamuhunan sa pangunahon sini nga mga alyado.

Ginasakdag sang US ang polisiya nga “globalisasyon nga neoliberal” agud pangibabawan ang penomenon sang *stagflation*⁵ sadtong dekada 1970 nga ginabasol sini sa pagtaas sang panuwelduhan kag sa gastos sosyal sang gubyrong, pero indi sa mga konsesyong pang-ekonomya nga ginahatag sini sa mga alyadong anti-komunista, sa kompetisyong militar sa USSR sadtong Cold War kag daku nga gastos sang gubyrong sa produksyong militar,

sa deployment sang mga pwersang militar sang US sa guwa sang pungsod kag sa nagasto na sa gerang agresyon sa Korea kag Indochina. Sandig sa linya sini nga “globalisasyon nga neoliberal,” ginpanubo sang US ang lokal nga lebel sang sweldo, nagresulta sang pagluya sang industriya, ginapaburan ang industriyang militar kag mga higante sa industriya sang langis kag ginasuportahan ang ginabansagan nga indi na industriyal nga ekonomya nga serbisyo kag *financialization*⁶ sang ekonomya.

Ang pagtibusok sang matuod nga kita sang pumuluyong Amerikano kumparar sa GDP nag-abot sa paliwat-liwat kag nagapalubha nga krisis sang sobrang produksyon sa porma sang mga resesyon kada dekada halin sadtong 1980. Pero ang pagpangutang permi nga dalaganan sang US agud makalampuwat sa mga resesyon kag permanenteng depisit sa negosyo kag badyet. Ang tatlo ka sektor sang ekonomya sang US—ang gubyerno, mga pribadong korporasyon kag mga pamilya—palareho nga nagsulod sa sobra kag di-masustenir nga pagpangutang. Ang mga ini nagsobra na sa mga limite kag nagtuga sang subong nga bug-at sang krisis sa pinansya kag ekonomya sang US kag bilog nga kalibutan.

Indi magnubo sa \$53 trilyon ang kabilugang utang sang US. Ini 350% sang GDP sang US nga \$14.6 trilyon. Tuman kalayo na ini sa Great Depression nga ang utang sadto 250% lamang sang GDP sang US. Ang kabilugang utang sang US ginabug-os sang utang sang gubyerno nasyunal nga \$10.6 trilyon, pang-korporasyon nga utang (pangpinansya kag di-pangpinansya) nga \$23 trilyon kag utang sang mga pamilya nga \$14 trilyon.

Wala pa sang \$1 trilyon ang nasyunal nga utang sang US sang magtapos ang administrasyong

Carter sadtong 1982. Naglab-ot na ini sa \$3.6 trilyon sang magtapos ang administrasyong Reagan. Halin sa pagka Numero Uno nga tagapautang, ang US nangin Numero Uno nga tagapangutang sa bilog nga kalibutan.

Ginsulod ni Reagan ang madasig kag “*hightech*” nga produksyong militar, ginpadaku ang depisit


sa negosyo sa paghatag-ligwa sa eksport sang mga anti-komunistang alyado sini kag nagbuyok sang dumuluong nga pamuhunan sa mga sapi kag bono sang US. Gintib-ong ni Clinton ang “globalisasyon nga neoliberal” kag ginpadaku nga ginpadaku ang depisit sa negosyo bisan pa nabalanse ang badyet. Sang magtapos ang termino ni Clinton, \$5.7 trilyon ang nasyunal nga utang sang US. Mas madasig pa ini nga ginpahabok sang rehimeng Bush. Ara sa \$10.6 trilyon na subong ang nasyunal nga utang sang US. Daku nga bahin sini (ginatantya nga \$2.5 trilyon) ang utang sa China, Japan, United Kingdom, Germany, Saudi Arabia, sa sentro sang pagbangko sa Caribbean kag iban pa.

Ang \$23 trilyon nga utang sang mga korporasyong US ang mas gamay sangsa aktwal. Nagapangutang sa bangko kag nagapaguwa man sang bono ang mga korporasyon nga di-pangpinansya. Ang pinakadaku nga korporasyon sa US pareho sang General Motors kag General Electric ang labi nga mas imbolbado sa pinansya sangsa sa produksyon. Madali pensaron nga mas lumos sa utang ang mga korporasyon pangpinansya sangsa mga di-pangpinansya. Makapautang ang mga bangko sa pamuhunan sang 9-10 pilo sang mga deposito kag, bunga sang Financial Services Modernization Act of 1999, nakapautang ang mga bangko sa pa-

muhunan sang 12-30 ukon mas daku nga beses kumparar sa ginabaton sini nga pamuhunan. Sa idalum sang Commodity Futures Modernization Act of 1999, wala sang limitasyon ang lain-lain nga institusyon pangpinansya sa mahimo sini nga sudlon nga patong-patong nga mga kontrata sa pinansya.

Ang mga utang sang mga pamilya sa US ara sa porma sang mga utang sa pabalay, utang sa pagbakal sang salakyan, *credit card* kag utang pang-edukasyon. Ginpadaku ini pangunahon sang bukal sa pabalay. Wala sang natipon kag nalubong sa utang ang kadam-an nga pamilyang Amerikano. Ang resyo sang kabilugang utang kumparar sa kabilugan nga kita sang mga pamilya nagaabot na sa 138%. Mas daku ini sang 37% kumparar sa lebel 40 tuig na ang nakaligad. Minilyon na ang nahunusan sang ila mga balay. Mas mataas ang tantos sang disempleyo sangsa sa upisyal nga 6.7% bangud wala pa maisip diri ang mga nag-untat na sa pagpangिता sang trabaho kag mga ginatawag nga di-kwalipikado sa mga trabaho. Masobra tunga sa milyon ang nadulaan sang trabaho kada bulan. Ang gulpe nga pagtibusok sang empleyo kag kita sang mga pamilya sa US nagresulta sa pagnubo sang epektibong demanda para sa produkto sang mga produktibong empresang Amerikano kag dumuluong.

Naglab-ot sang pila ka dekada nga paglala ang krisis sa pinansya kag ekonomya antes ini maglupok. Wala ini nalubad sa malip-ot nga panahon sang isa ukon duha ka tuig lamang. Ang mga solusyon nga ginapatuman na, pareho sang pag-salbar sa nagasara nga mga institusyon pangpinansya, nagapalala pa sa problema. Ang amo nga paggamit sang pondo pangpubliko ang



katumbas sang pagpangawat sa mga ginkawatan para isalbar ang mga makawat. Pag-uyang lamang ini sang kwarta. Wala sini ginabuhing produksyon, empleyo kag epektibong demanda. Wala ginalubad pati ang pag-istrikto sa pagpangutang sang mga bangko bangud indi magpautang ang empresa para sa produksyon kon indi mabaligya ang ila mga produkto. Ginagamit lamang sang pinakamabaskog nga grupong monopolyo sa pinansya ang pondo pangsalbar agud ikonsolidida kag pabaskugon ang ila pusisyon sa negosyo. Pinakamalaut pa diri, nagadaku ang bukal sang utang nasyunal kag madali na nga maglupok. Ginalauman nga magatibusok sa maabot nga tuig ang merkado para sa mga bono sang gubyerno kag mga korporasyon.

Ang plano ni Obama nga magtuga sang 2.5 milyon nga trabaho paagi sa mga proyekto pang-imprastruktura kag pagpalapad sang mga serbisyo sosyal indi bastante para pun-an bisan ang manubo nga tantya nga apat ka milyon nga madulaan trabaho bunga sang labi pa nga pagtibusok sa pinansya, mga pagkabangkrap, pagsara sang mga pabrika kag madamuan nga pagpahalalin sa trabaho. Ang pondo nga magamit sa Keynesian nga pagpasikad sa ekonomya labi pa nga nalimitahan sang ginapangayo sang mga pangpinansyang institusyon, mga korporasyon nga di-pinansyal pareho sang Big Three nga prodyuser sang salakyan (General Motors, Ford kag Chrysler), ang padayon nga pagpanalakay nga gera sa Iraq kag Afghanistan, ang gulpe nagbagsak ang koleksyon sa buhis kag sang padayon nga kinahanglanon nga magangkat sang mga produkto.

Nagahana ang isa ka malawig nga resesyon ukon depresyon sa US nga pareho sa Japan. Matapos magtimbuok ang presyo sang pagkaon kag langis, nga nagdala sang

superganansya sa mga higante nga korporasyon sa langis kag pagkaon, nagatuhaw subong ang huyog sang depstasyon nga nagtulod sa US Federal Bank nga panubuan ang basehang interes sang halos wala. Sa amo pa man, ang makabenepisyo indi ang minilyon nga mamumugon nga Amerikano nga nadulaan sang trabaho, balay, mga tinago kag pondo pangpensyon, kundi ang mas mabaskog nga institusyon pangpinansya, nga nagalamon sa mas magagmay. Ang malawig nga depresyon sa bilog nga kalibutan pinakamalala kag pinakamadalum pa subong sang pangkalibutanon nga pag-istrikto sa pagpautang kag paggamay sang kinahanglanon sang mga Amerikano nga konsyumer.

Sining ulihi nga kwarto sang tuig, minilyon nga mamumugon ang ginsipa nga wala pa sang kapares sa kadasig sa mga imperyalistang pungsod kag ilabi na sa mga neokolonya. Madasig nga nagadamo ang mga tawo nga nagakabuhing sa kulang sa \$1 tubtub \$2 kada adlaw. Isa ka bilyon nga tawo ang ginagutom kada adlaw. Duha ka bilyon ang wala sang makuhaan sang limpyo nga tubig. Ang subong nga kinagamu pat-ud nga magaresulta sang mas madasig pa nga paglala sang kaimulon sa mga maabot nga tuig. Bulnerable sa partikular ang minilyon nga mamumugon nga manubo ang sweldo sa mga monopolyo kapitalistang empresa sa mga *export-processing zone* bangud sa naganubo nga order halin sa mga industriyalisadong pungsod para sa


mga produktong pangkonsumo kag mga malamanupaktura. Minilyon nga mangunguma, mamumugon sa uma kag mamumugon sa industriya sang pagmina (*extractive industries*) ang labi pa nga magaantos bangud sa pagtibusok sang demanda para sa hilaw

nga materyales. Ang mga migranteng mamumugon, ilabi na ang mga di dokumentado nga mamumugon ang labing mangin bulnerable bangud sila ang ginabasol sa nagadaku nga disempleyo sa mga kapitalistang pungsod kag ginapauli na sila sa ila mga ginhalinan nga pungsod.

Sa likod sang ila bibig pirme nga pagkabalaka sa nagabag-o nga klima kag sa kapalibutan padayon nga ginapasanyog sang mga imperyalistang pungsod ang pagpatuyang sa mga dunang-maggad sang mga neokolonya. Sa ila naghalin ang halos tanan nga *green house gas*⁷ nga gintunaan sang pag-init sang kalibutan kag nagaresulta na sa paggamay sang ani, nagadaku nga kakulangan sa pagkaon kag tubig, mga sakit kag pagkamatay sa mga ginhimuslan kag ginapigos nga pungsod.

Sa ngalan sang "globalisasyon nga neoliberal," ang US ginapabugal nga motor sang pag-uswag kag balaligyaan nga "*last resort*"⁸ sang pangkalibutanon nga ekonomya sa nagligad nga tatlo ka dekada. Pero maathag nga ini subong ang sentro sang pangkalibutanon nga krisis sa pinansya kag ekonomya kag maathag nga ginahalalan sang pagkaguba sa mga produktibong pwersa kag kinagamu nga sosyo-ekonomiko kag pulitikal. Bunga sang subong nga grabeng krisis, labi nga nagluya ang pusisyon sang US bilang Numero Uno nga imperyalistang kusog, ilabi na sa aspeto pang-ekonomya kag pangpulitika,

bisan pa pinakamabaskog gihapon ini sa aspeto nga militar. Ang subong nga krisis nagabunga sang pangkabilugang pagluya sang US kag paghalog sang iya kontrol sa mga imperyalistang alyado sini. Nagaka-



dasma ang mga ini sa pagpangapin sang ila nasyunal kag ultra-nasyunal nga interes kag ginaduso ang kalibutan nga *multipolar*⁹ kag paglayo sa kalibutan nga *unipolar* nga wala sang kwestyon ang dominasyon sang US.

Ginapaluya ang US indi lamang sang krisis sa pinansya kag ekonomya kundi pati sang mga kaugalingon nga gerang agresyon sa Iraq kag Afganistan kag sang pangkalibutanon nga deployment sang mga pwersang militar sini. Magapabilin nga kumunoy ang Iraq para sa US kag mga papet sini samtang may base didto kag may hugot nga kontrol sa resorsa sang langis. Indi pag-isurender sang pumuluyong Iraqi ang ila pagpakigbato. Kon magpasulod ang US sa idalum ni Obama sang dugang nga pwersang militar sa Afghanistan, maagyan sini ang kahimtangan sadto sang magpanalakay ang pwersang Soviet. Para sa US kag NATO mangin mas madalom nga kumunoy sa ila ang Afghanistan.

Nagabaskog ang kumpetisyon sang mga imperyalistang gahum para sa langis kag iban pa nga dunang-manggad, patag sang pamuhunan kag sakop sang impluwensya. Nagabaskog ang huyog sang mga imperyalistang gahum nga guwa sa US nga protektahan ang ila nasyunal nga interes. Nagapatumang sila sang mga polisiya sa pagpamuhis kag pinansya nga luwas sa US agud makabulig sa krisis sa pinansya kag ekonomya kadungang ang paglikaw ukon pagpugong nga mabutong sa mga gerang agresyon sang US. May maathag na nga mga talamdan nga ginabanggi sang pila ka imperyalistang gahum ang tindog sang US sa mga isyu pang-ekonomya, pangpinansya, pangpulitika kag pangsiguridad.

Bangud ginainteresan sila sang mga imperyalista kag bangud aktibo sila nga nagahandum sang mas daku nga papel sa mga halambala-

non pangkalibutanon, ang pila ka dalagku pero di gid man mauswagon pareho sang China kag India may timbang sa nagabag-o-bag-o nga balanse sang mga pwersa sa kubay sang mga imperyalistang gahum. Ang China na ang pinakadaku nga ginautangan sang US bisan nagapabilin ini nga imol kag nakasalig sa merkado sang US para sa barato sini nga mga produktong pangkonsumo kag bulnerable sa ginapaabot nga pagtibusok sang balaligyaan sang bono kag sang dolyar sang US. Sa amo pa man, nagapakigkumpetisyon ini sa US para sa pagakuhaan sang langis kag iban nga dunang-manggad kag hilway nga nagapangita sang mga merkado kag patag sang pamuhunan sa lain-lain nga bahin sang kalibutan. Ginagamit sang Russia ang manggad nga langis kag gas sini kag ang nagapadayon sini nga iksarang militar agud ipabilin ang kaugalingon bilang mayor nga imperyalistang gahum.

Nagabaskog ang mga reklamo sa dominasyon sang US sa UN, IMF, World Bank, WTO kag iban pa nga pangkalibutanon nga institusyon. Sa nakatungdan, nag-upod ang France sa Russia sa pag-insister sa pagtukod sang bag-o nga alyansang pangsiguridad sa Europe kabaylo sang NATO kag sa pagpamatuk sa *missile shield*¹⁰ nga gintukod sang US sa Poland kag Czechoslovakia. Sa



lakip ang anay mga republikang Soviet sa Central Asia kag mga mayor nga pungsod sa Middle East kag South Asia. Napanginpuslan man sang US sa umpisa, ang lubos nga pagsimpon liwat sang Russia kag China sa pangkabilutanon nga sistemang kapitalista nga sa katapusan nagpasingki sa kontradiksyon sang mga imperyalista, sa baylo nga magbunga sang pag-abyanay kag matawhay nga paglapad sang kapitalismo.


Bisan nagapaluya ang Numero Uno nga pusisyon sang US, may yabi nga papel gihapon ini sa mga imperyalistang gahum sa malapit nga inadlaw. Dapat naton tumukan nga nagaisa gihapon ang mga imperyalistang gahum batuk sa mga pigos nga pumuluyo kag pungsod sang kalibutan kag permi ginatinguha nga isaylo sa mga ini ang bug-at sang krisis. Ang kontradiksyon sa tunga sang mga imperyalistang gahum kag pigos nga pumuluyo kag pungsod amo ang pangunahon gihapon nga kontradiksyon sa kalibutan, indi lamang bangud gamit sang imperyalista kag papet nila ang pinakamapintas nga porma sang pagpamigos kag pagpanghimulos sa pagpaantos sang pumuluyo sang Asia, Africa kag Latin America, kundi bangud man sa nagapadaku nga aktwal kag potensyal nga paghimakas para sa pungsodnon kag kahilwayan sosyal.

Ang subong nga krisis sang imperyalismo nagatuga sang masingki nga pag-antos sang binilyon nga pumuluyo sang ikatlong kalibutan pero ginadabukan man sila nga magbato kag nagahatag sa ila sang mas daku nga ligwa nga maghimakas para mahilway halin sa imperyalismo kag tanan nga reaksyon. Ginakaugtan sang malapad nga masang pumuluyo ang labi nga nagalala nga pangkabilugang krisis sang pangkalibutanon nga sistema kag ang nagalala nga pagpa-

migos kag paghimulos sa ila. Tuig-tuig malauman naton ang pagpag-sik sang lain-lain nga ligal kag iligal nga porma sang ululupod nga pagbato sang pumuluyo.

Magakadto sa bag-o kag mas mataas nga lebel ang rebolusyonaryong armadong paghimakas sang pumuluyo sa mga pungsod pareho sang Iraq kag Afghanistan, nga ginasalakay kag ginasakop sang US kag iban pang imperyalistang gahum. Ang madugay na nga mga armadong kahublagan para sa pungsodnon nga kahilwayan kag demokrasya, pareho sang sa Pilipinas, Colombia, India, Peru kag Turkey, magasulong sang daku kag magahatag-inspirasyon sa pag-igrab sang mas madamu pa nga inaway banwa sa lain-lain nga kontinente. Ang pumuluyo kag mga gubyrerno sang Democratic People's Republic of Korea, Cuba, Venezuela, Bolivia, Ecuador kag iban pang pungsod sa Latin America ang tampok sa paginsister sang pungsodnon nga kahilwayan batuk sa mapang-away nga mga polisiya sang imperyalismong US.

Nagapabilin nga matambok nga duta ang South Asia para sa madasig nga pagdaku sang armadong rebolusyon para sa pungsodnon nga kahilwayan, demokrasya kag sosyalismo. Paagi sa inaway banwa sa Nepal, natigayon sang Communist Party of Nepal (Maoist) nga pukanon ang monarkiya, tukuron ang isa ka republika kag pamunuan ang gubyrnong koalision. Mahimo tungdan sang pumuluyo kag mga rebolusyonaryong pwersa nga ginapamunuan sang Communist Party of India (Maoist) ang dungganon nga papel sang pagdul-ong sang pangkalibutanon nga prole-



taryong rebolusyon sa bag-o kag mas mataas nga lebel pareho sang ginhimo sadto sang Russia kasunod sang unang gera pangkalibutanon kag sang China kasunod sang ikaduha nga gera pangkalibutanon. Anupaman, malapad ang madalom nga disgusto sang proletaryado kag pumuluyo sang Russia kag China. Malig-on nga nagasulong ang mga rebolusyonaryong partido komunista para ibayaw ang pulang bandera kag ginpanubli nanday Marx, Engels, Lenin, Stalin kag Mao.

Ang pagdugmok sang Soviet Union kag mga rebisyunistang rehimen sa blokeng Soviet, ang pagpanumbalik sang pinakamalaut nga porma sang pagpamigos kag pagpanghimulos sa Russia kag China kag ang pagpandambong sang US kag pangkalibutanong krisis sa ekonomya kag pinansya nagahayag sang kagarukan sang pangkabilugan nga sistemang kapitalista kag nagatudlo sa daku nga hangkat kag kahigayunan para isulong sang pumuluyo ang ila rebolusyonaryong katuyuan. Nagalapta ang kinagamo pangkatilingban sa China, sa anay mga republikang Soviet kag mga pungsod sa anay blokeng Soviet. Labi nga nagabaskog ang pagsikway sang pumuluyo sa kapitalismo kag paginsister sang sosyalismo.

Sa sulod sang mga imperyalistang pungsod, nagatuhaw kag nagatampok ang makasahi nga banggianay sang monopolyong burgesya kag sahing mamumugon. Nagaindakal sa kaakig ang mga mamumugon, pamatan-on, kababainhan kag mga migrante sa pagdaku sang disempleyo kag paggamay sang kita nila, kag sa sobra nga pagkamaasab kag kahambugon sang monopolyong burgesya. Nagapabaskog ang ila pagpakamalaut sa kapitalismo kag panawagan para sa sosyalismo. Nagabaskog ang mga partido sang Wala sa pila ka pungsod sa Europe.


Agud ilikaw ang proletaryado kag pumuluyo halin sa makasahing banggianay kag paghiliusa nga anti-imperyalista, ginahimo sang monopolyong burgesya kag garuk sining mga pulitiko ang tanan agud ipalapta ang sobinismo, rasismo, pasismo kag isterya sang gera.

Pero paliwat-liwat man nga napamatud-an nga ang proletaryado kag pumuluyo sa mga imperyalistang pungsod, lakip ang US, may ikasarang magtindog batuk sa mapanghimulos kag mapiguson nga mga polisiya sang monopolyo kapitalismo. Ang kabaskugon sang subong nga krisis sa pinansya kag ekonomya pat-ud nga magapukaw sa malapad nga masa sang pumuluyo batuk sa kapitalistang sistema. Sa pagdugay sang krisis sang pila ka tuig kag posible masobra isa ka dekada, may bastante na nga kahigayunan ang mga rebolusyonaryong pwersa nga pukawon, organisahon kag pahulagon ang masa kag mag-uswag sa ideolohiya, pulitika kag organisasyon.


Ang lubos nga pagkabangkrap sang "globalisasyon nga neoliberal" nagapakita sa proletaryado kag pumuluyo sang kalainan sang monopolyo kapitalismo bangud ginaguba sini ang mga pwersa sang produksyon kag nagatuga sang di masarangan nga pag-antos kag sang gilayon nga kakinahanglanon para sa rebolusyonaryong paghimakas para sa pungsodnon nga kahilwayan, demokrasya kag sosyalismo. Paborable para sa rebolusyonaryong aktibibidad ang kundi-syon sang krisis pero indi ini awtomatiko nga magbun-ag sang rebolusyon. Ang muklat kag organisado nga mga rebolusyonaryong pwersa, pangunahon ang rebolusyonaryong partido sang proletaryo, ang dapat magtinguha kag lubos nga maghimakas agud manawagan sa malapad nga masa sang pumuluyo kag idul-ong sila sa dalan sang rebolusyon.

II. Desperado nga kahimtangan sang nagahari nga sistema sa Pilipinas

Ara sa permanente nga krisis ang malakolonyal kag malapyudal nga nagahari nga sistema sa Pilipinas bangud ginaagyan sini ang pinakamalala nga porma sang pagpanghimulos kag pagpamigos halin sa dumuluong nga monopolyo kapitalismo, lokal nga pyudalismo kag burukrata kapitalismo. Gani bulnerable ini sa mga tiyog sang pangkabilugan nga krisis sang pangkalibutanon nga sistemang kapitalista kag sa subong nga krisis sa pinansya kag ekonomya nga ginalaragway na sang mga nagapamuno sang mga imperyalista nga pungsod nga pinakamalala na halin sadtong Great Depression kag ginalaragway man sang pila nga mga manug-analisa sa ekonomya nga wala sang katulad sining ulihi nga 100 tuig.



PAGBAGSAK NG KITA



Apang sa laban sang nagligad nga tuig, binutig nga ginpat-ud sang rehimeng Arroyo kag mga eksperto sini sa ekonomya nga ang Pilipinas bulag ukon luwas sa krisis sa pinansya kag ekonomya sang US kag sang pangkalibutanon nga sistemang kapitalista. Ginapabugal nila ang mabaskog kuno nga pundasyon sang isa ka ekonomya nga sa aktwal pre-industriyal, malapyudal kag agraryo, nakasalig sa pag-eksport sang mga hilaw nga materiyales kag mga malamanupaktura nga manubo ang dugang-balor kag sa mga remitans sang mga kontraktwal sa mamumugon sa luwas sang pungsod kag sa panggwa nga utang para pun-an ang mga depisit sa negosyo kag badyet.

Wala magdulot ang mga kabutigan sang rehimen ilabi na sadtong nagtimbuok ang presyo sang pagkaon kag panggatong. Naakig ang pumuluyo bangud ang Pilipinas agrikultural nga pungsod kag daan nga base sang "miracle rice," nanigin numero uno na ini nga taga-angkat sang bugas sa bilog nga kalibutan. Bunga ini sang pila ka dekada nga pagtambak diri sang bugas sa idalum sang liberalisasyon sang negosyo nga malayo nga nau-

na pa sa iskedyul sang pagbuhin sang taripa nga gintalana sang World Trade Organization. Resulta man ini sang pagbaylo-gamit sang duta halin sa produksyon sang palay kag mais pakadto sa iban nga tanom nga pang-eksport ukon lubos nga indi-agrikultural nga gamit.

Ginapabugal sang rehimen nga naprotektahan sini ang ekonomya halin sa pangkalibutanon nga krisis sa pinansya kag ekonomya paagi sa pagsukot sang dugang nga buhis sa pumuluyo sa porma sang *expanded value added tax* sa sugo sang International Monetary Fund. Gintumod sini nga 20% lang sang mga eksport sang Pilipinas ang nagkadto sa US kag anuman nga buhin sa eksport indi makapalain sa pungsod. Sa kamatuoran, nagaabot sa 25 % sang mga direkta nga eksport sang Pilipinas ang nagkadto sa US. Dugang diri, ang nagdaku nga mga eksport sang Pilipinas sa Hongkong, China, Taiwan, South Korea kag Japan nagkadto man sa US pagkatapos ang pila ka dugang nga pagproseso.

Sigurado nga malala ang igo sa Pilipinas sang pagkitid sang produksyon kag balaligyaan pangkon-

sumo sa US bangud sa mas manubo nga demand sa US para sa mga eksport sang Pilipinas. Pinakamalain, ang pangkalibutanon nga pag-istrikto sa pautang nagadingot sa mga nagahari sa Pilipinas sang yabi nga rekurso nga pangpuno sa mga depisit sa negosyo kag badyet kag sang mautang nga pangbayad sa daan nga mga utang para magtuga sang ilusyon sang pag-uswag sang ekonomya. Samtang nagalawig kag nagalala ang krisis sa pinansya kag ekonomya, naganubo ang demanda para sa mga kontraktwal nga mamumugon nga Pilipino sa iban nga pungsod. Nagakahulugan ini sang paggamay sang mga remitans nga dumuluong nga kwarta bilang mayor nga rekurso nga pangpinansya nga naandan na sang Pilipinas.

Magalubha ang depresyon sang ekonomya sang Pilipinas. Ang paggamay sang kita sa eksport, dumuluong nga pautang kag mga remitans sang mga kontraktwal nga mamumugon sa luwas sang pungsod nagakahulugan sang mas buhin nga rekurso para sa produksyon kag konsumo sa Pilipinas. Subong pa lang ginpanubo na sang rehimeng Arroyo ang mga daan nga ginantya nga porsyento ang pag-uswag sang ekonomya, pero sobra pa gi-hapon ini kag indi lubos nga nagkunsidera sa pag-istrikto sang pautang. Ang reyalidad sang depresyon nagakahulugan sang mas madamu nga pagkaputo, pagsira, pagbagsak sang produksyon, madamuan nga pagpahalain sa trabaho kag malala nga pagnubo sang kita sang masa nga anakbalhas kag mangin sang mga nahununga nga saray sang katilingban.

Sa subong, ang depresyon sang ekonomya sa Pilipinas nagbunga na sang malala kag lapnagon nga disgusto sa kubay sang malapad nga

masa sang pumuluyo. Ang pagduso sang trabaho, disente nga sweldo, pag-uswag sang industriya, re-porma sa duta, bastante nga serbisyong sosyal kag pagtahod sa demokratiko nga mga kinamatarung sang masa nga anakbalhas kag mas mabaskog nga lanog kag magaganyat sa malapad nga masa sang pumuluyo nga magmartsa kag magrali sa karsada kag magtipon sa nagkalain-lain nga pangpubliko nga lugar.

Indi mapalagyuhan sang mga reaksyunaryo ang depresyon kag permanenteng krisis sang nagahari nga sistema. Wala sang anuman nga parte sang daku nga balor ang ginautang sa sulod kag sa gwa sang pungsod, ginasukot bilang buhis sa pumuluyo ukon ginapadala sang mga kontraktwal nga mamumugon sa luwas sang pungsod ang nagakadto sa pagpauswag sang industriya. Bisan ang mga duta nga agrikultural nga nakatalana sa mga pangunahon nga pananom naggamay bangud sa pagsaylo sa mga pananom nga pang-eksport, espekulasyon sa *real estate* kag iban pa nga empresa nga nagagamit sang malapad nga kadutaan.

Labi pa gid nga magahandum kag magaduso ang pumuluyo sang rebolusyonaryong solusyon sa krisis pang-ekonomya kag pangkatilingban samtang nagagamit ang mga kontra-rebolusyonaryo nga nagahari sang kusog kag pagpaniplang para patalangan kag lupigon sila. Mismo ang kontra-rebolusyonaryo ang nagalapak sa mga basehan nga kinamatarung demokratiko sang pumuluyo kag wala sang ginatanyag nga solusyon sa mga problema pangkatilingban kag pang-ekonomya kundi labi pa nga pagtraidor sa pungsudnon nga independensya, soberanya nga pang-ekonomya kag pungsudnon nga patrimonya sandig sa wala sang kredibilidad nga pagsulondan "neoliberal nga globalisasyon" ang labi

pa nga magatulod sa pumuluyo para magrebolusyon.

Ang magkaribal nga paksyon pangpulitika sang nagaharing sahi sang dalagku nga kumprador kag agalon nga mayduta nagatuhay sa ngalan sang ila partido kag koalisyon apang pareho sila sa ila pagsunod-sunod sa polisiya "neoliberal nga globalisasyon" nga dikta sang US. Ang ginaagawan nila amo ang bendisyon sang US kag ang benepisyo nga makuha sa gahum pangpulitika. Anuman nga reaksyonaryo nga paksyon ang mabutang sa poder may tendensya nga solohon ang mga benepisyo. Sa pihak nga bahin naman, ang mga paksyon sang oposisyon masako sa pagduso sang limpyo nga gubyrno kag pagpamatuk sa korapsyon pero nagalikaw sa mga sandigan nga halambalanon sang independensya, demokrasya, kauswagan pang-industriya, tunay nga re-porma sa duta, kultura sang pumuluyo kag hilway nga pagsulondan pangluwas.

Kada reaksyonaryo nga nagaharing hubon, halin kay Ramos tubtob kay Arroyo nagapropener nga amyendahan ang konstitusyon 1987 sang reaksyunaryo nga gubyrno para palawigon ang paghari kag dulaon ukon bag-uhon ang mga probisyon nga nagbunga sang paghimakas sa pagsistang diktadura nga US-Marcos, pareho sang mga probisyon nga nagagenda sa deklarasyon sang layi militar, naghatag-proteksyon sa tawhanon nga kinamatarung kag kahilwayan sibil, nagasakdag sa soberanya pang-ekonomya kag pungsudnon nga patrimonya kag nagadumili sa mga dumuluong nga base militar,

dumuluong nga tropa kag pagtipon kag pagdala sang armas nukleyar sa teritoryo sang Pilipinas. Sa kamatuoran, gin-uk-ok kag ginpalibutan na ang mga ini paagi sa mga layi kag kasugtanan nga ehekutibo.

Kon kasan-o ang pagsulondan "neoliberal nga globalisasyon" nga dikta sang US lubos na nga nawadan sang kredibilidad bunga sang subong nga krisis sa pinansya kag ekonomya, amo naman nga gindeklarar sang mga ulipon sang rehimeng Arroyo sa House of Representatives nga ang katuyuan nila sa ginapropener nga pag-amyenda sa konstitusyon 1987 sang reaksyunaryo nga gubyrno amo nga ihaboy ang soberanya pang-ekonomya kag pungsudnon nga patrimonya kag pahanugutan ang 100% pagpanag-iyang sang mga dumuluong nga nagapangapital sa duta kag tanan nga sahi sang empresa. Nagtraidor sa banwa ang rehimeng Arroyo kabaylo sang pagpabilin sini sa gahum.

Ang nagapalala nga pangkatilingban kag pang-ekonomya nga krisis padayon nga nagagatong sa pangpulitika nga krisis sang nagaharing sistema. Ang mga nagaharing sahi labi nga indi makahari sang may anuman nga malawigan nga moral nga awtoridad, sa anuman nga reaksyunaryo nga paksyon ang makapungko sa poder. Malawig na nga nagakabuhi ang malapad nga masa sang pumuluyo sa pagpakatuta, kagarukan, kabutigan kag kapintas nga siya ang marka sang kada reaksyunaryo nga nagaharing hubon. Gani mabaskog sila nga nagahandum sang rebolusyonaryo nga pagbag-o kag mabaskog nga nagahandum nga pamunuan kag padasigon sang rebolusyonaryong partido ang pagsulong sang paghimakas para ibagsak ang bilog nga



nagaharing sistema kag tukuron ang demokratikong estado sang banwa.

Sa pagpanguna sang nagaharing hubon Arroyo, tatlo ka pormasyon pangpulitika ang nagakunsa-buhay sa isa ka mahuyang nga alyansa para sa paghari sang pumuluyo. Ini ang Kabalikang Mamamayang Pilipino (KAMPI) sang paltik nga presidente nga si Arroyo, ang Lakas-NUCD ni anay presidente Ramos kag ang Nationalist People's Coalition sang daan nga kroni ni Marcos nga si Eduardo Cojuangco. Ini ang pinakadalagku kag pinakamanggaranon nga pormasyon pangpulitika apang wala naman sang kredibilidad, labi na gid sa korapsyon.

Nakahanay kontra sa mga dominanteng pormasyon nga ini ang tuman ka gamay nga partido nga makabenepisyo sa pagkaguba sang mga dominanteng partido pero may tendensya nga mangin tunga-tunga. Kalakip diri ang Nacionalista Party ni Manuel Villar, ang Liberal Party ni Mar Roxas, ang Partido sang Masang Pilipino ni anay presidente Joseph Estrada, ang PDP-Laban ni Aquilino Pimentel, kag ang temporaryo nga koalisyong ginatawag nga United Opposition (UNO).

Ginaduso sang nagaharing hubon ni Arroyo ang pagbag-o sa konstitusyon paa-gi sa *constituent assembly* bilang maniobra para palawigon ang pagginahum sini. Pero indi makigbuligay ang Senado sa House of Representatives, ilabi na gid bangud sa malapad nga pagpamatuk sa proyekto nga *charter change* ni

Arroyo. Nagahanda ang nagaharing hubon Arroyo nga dayaon ang eleksyon 2010 para protektahan ang mga nakurakot sini kag seguruhon indi ini masilutan sa mga kriminal sini nga salabton. Nagahanda ini nga magamit sang malaparan nga pagdina-ya kag terorismo sa eleksyon para siguruhon nga mapilian ang kaugalingon sini nga mga kandidato.

Magasingki ang mga kontradiksyon sa kubay sang mga reaksyunaryo nga pormasyon pangpulitika samtang ginatuyo sang nagaharing hubon Arroyo nga dayaon ang eleksyon sa 2010 pareho sang ginhimo sini sadtong 2004. Magasingki man ang mga kontradiksyon sa mga paksyon sa militar kag pulisya. Madalom kag malapad ini bangud ginalagas sang hubon Arroyo ang mga upisyal kag suldado nga nagapakamalaut sa kriminal sini nga mga pagsulondan kag hilikuton kag ginapaboran indi lang yadtong mga nagadampig sa nagahari nga hubon kundi yadtong hayagan nga nadalahig sa korapsyon kag iban pa nga mabaskog nga ginakitaan nga kriminal nga aktibidad sa sulod kag gwa sang militar kag pulisya.

Husto ang pagsunod kag pagpamtuman sang Partido sa pagsulundan sang malapad nga nagahiliugyon nga prente sa paghingalit sini sa mga kontradiksyon kag banggianay sa kubay sang mga reaksyunaryo kag sa paghandum sini nga matukod ang obhetibo ukon muklat nga pagpakig-alyansa kag pakigbuligay sa mga grupo kag indibidwal sa mga reaksyunaryong partido kag koalisyon, sa sibil nga burukrasya kag sa militar kag sa pulisya nga nagapahayag sang mga patriyotiko kag progresibong panindugan kontra sa mga reaksyunaryo nga pinakamalala kag pinakamasupog nga tuta

sang mga imperyalista.

Importante ang mga gindala nga isyu sang malapad nga nagahiliugyong prente kontra sa rehimeng Arroyo, kalakip ang pagpangdaya sa eleksyon sadtong 2004, madamu ang dalagku nga kaso sang korapsyon, malala kag sistematiko nga paglapas sa tawhanon nga kinamatarung, indi alalangay nga mga kasugtanan sa negosyo kag ekonomya sa mga dumuluong nga gahum kag ang iskema para amyendahan ang konstitusyon sang 1987.

Ang rehimeng Arroyo amo ang pinakamalaut sa mga reaksyunaryo kag sa sina siya ang kaaway sang pumuluyo kag rebolusyunaryong kahublagan. Makumparar ini sa pasista nga diktadura nga Marcos sa pagpakatuta sini sa imperyalismong US. Lubos katampad sini nga ginasunod ang mga patakaran sang "neoliberal nga globalisasyon" kag "gera kontra sa terorismo" nga ginadikta sang US—sa pihak sang pagkabangkarote kag lubos nga nadulaan sang kredibilidad sang mga pagsulondan nga ini. Ginakabig ini nga pinakakorap nga rehimen sa bilog nga Asia kag ikaduha sa pinakakorap sa bilog nga kalibutan. Malala kag sistematiko ang mga paglapas sini sa tawhanong-kinamatarung.

Kalakip sa mga paglapas sini sa tawhanong-kinamatarung ang malaparan nga kampanya militar para lupigon ang mga mamumugon, imol sa syudad, masa sang mangunguma kag pungsudnon nga minoriya; mga ekstrahudisyal nga pagpamatay, pagdukot kag pagtor-tyur sang mga ligal nga demokratiko nga aktibista (kalakip ang mga mamumugon, mangunguma, kababainhan, pamatan-on, tawong-simbahan, abugado, tagasakdag sang tawhanon nga kinamatarung kag tagasakdag sang kalinungan) kag mga *consultant* sang National Democratic Front of the Philippines (NDFP) nga nagaangkon sang mga garantiya sa



ila kaluwasan sa idalum sang GRP-NDFP Joint Agreement on Safety ang Immunity Guarantees.

Ginasulsulan sang mga imperyalsitang US ang rehimeng Arroyo nga magbuhi sang mapintas nga kampanya militar kag pungan ang negosasyon pangkalinungan sang GRP kag NDFP nga mag-abanse pakadto sa pag-atubang sa mga ugat sang armado nga banggianay sa paagi sa mga reporma sa katinglaban, ekonomya, pulitika kag konstitusyon. Ginapabantog sang US kag rehimeng Arroyo ang ginatawag “pangkalibutanon nga gera kontra sa terorismo” para mapahanugutan ang pagpasilabot-militar sang US sa gera sibil sa tunga sang mga rebolusyonaryo kag kontra-rebolusyonaryong pwersa kag ang padayon nga pagbase kag operasyon sang mga pwersa militar sang US sa aton nga pungsod.

Santo sa mga dikta sang amo sini nga US, ginhimo nga imposible sang rehimeng Arroyo ang liwat nga pagbuhi sa pormal nga pagsugilanon sa tunga sang duha ka *negotiating panel* sa GRP-NDFP *peace negotiations* bangud ginhimo nga kondisyon para diri ang pagsurender kag pasipikasyon sang mga rebolusyonaryong pwersa kag pumuluyo nga ginakumoplahe sa porma sang malawigan untat-lupok kag pagbalibad sini nga palig-unon kag sundon ang mga daan na nga pirmado nga nakasugtan bilateral nga wala nakakondisyon sa pangmalawigan nga untat-lupok. Ang malisyoso nga katuyuan sang rehimen amo nga islan ang sugilanon pangkalinungan sang negosasyon para sa untat-lupok kag pagsurender, ibasura ang daan na nga napirmahan nga mga kasugtan kag pungan ang sustantibo nga negosasyon para sa mga reporma sa katinglaban, eko-

nomya, pulitika kag konstitusyon. Pagkatapos sini nga patyon ang madamu nga *consultant* sang NDFP kag mga progresibong aktibista, ginaduso naman sini subong ang pagsurender sang pinakakabuhi sang bilog nga rebolusyonaryong kahublagan.

Wala sang mapilian ang Partido kag ang bilog nga rebolusyonaryong kahublagan kundi nga pabaskugon ang rebolusyonaryo nga armadong paghimakas kontra sa daan na nga ginpasingki nga kampanya militar para lupigon ang pumuluyo sa idalom sang OBL2 kag Enhanced National Internal Security Plan.

Mahingalitan sang Bag-ong Hangaway sang Banwa ang madasig nga nagalala nga krisis sang lokal nga nagaharing sistema kag sa US kag pangkalibutanon nga sistemang kapitalista. Pinakakongkreto nga bagay para sa bentahe sini ang paghingalit sa problema sa pag-atubang sang reaksyunaryong guberno kag armado nga pwersa sa duha ka patag sang gera—isa sa teritoryo sang mga Moro kag isa pa sa bilog nga kapuluan sang Pilipinas.


Ginsara na sang rehimeng Arroyo ang pwertahan sa pagnegosasyon pangkalinungan sa Moro Islamic Liberation Front

paagi sa pagbasura sa Memorandum of Agreement on Ancestral Domain (MoA-AD) kag pagduso nga liwat buhion ang impormal nga paghambalanay nga wala ang MoA-AD. Ginsara naman sini ang pwertahan sa liwat nga pagbuhi sa pormal nga pagpakig-estorya sa NDFP bangud sa pagpapanaog sang mga kundisyon nga lapas sa The Hague Joint Declaration kag tanan nga iban pa nga daan nga pirmado nga kasugtan.

May estratehiko nga importansya ang pagbato sang pumuluyo nga Pilipino kag Bangsamoro para sa ila rebolusyonaryong handum sa ila teritoryo kag ang maksimisasyon sang ila paghiliusa, koordinasyon kag kooperasyon sandig sa malawig na nga kasugtan nga alyansa sang NDFP kag MILF.

Daku nga bentahe para sa mga rebolusyonaryong pwersa kag pumuluyo nga ginatiglawas sang NDFP kag MILF nga pareho sila nga nagapakig-away sa isa ka wala na gid sang kredibilidad kag lubos nga nahamulag nga rehimen nga ginaputos sang malala nga lokal kag pangkalibutanon nga krisis. May ara sila nga bastante nga kadakuon para sistematiko nga magdulot sang makakamatay nga mga bunal sa madamu nga mahina nga bahin sang armadong pwersa sang away kag sang nagaharing sistema.

Pinakapangunahon ang mabasog nga pagbunal sa mahina nga bahin sini para kuhaan sang ikasang kag waskon ang nagaharing sistema. Bunga sini, mahimo pa nga magdaku ang rebolusyonaryong kusog sang pumuluyo kag mag-agum sang dugang pa nga mga kadalagan. Masaligan naton nga matukod sang pumuluyo kag mga rebolusyonaryong pwersa ang isa ka bag-o nga Pilipinas nga independente, demokratiiko, makatarungan, mauswag kag malinong.



III. Mga dalagku nga kadalag-an sang Partido Komunista sang Pilipinas

Sining nagligad nga kwarenta ka tuig, ang Partido Komunista sang Pilipinas nakaangkon sang mga dalagku nga kadalag-an sa ideolohiya, pulitika kag organisasyon nga may malawigan nga importansya kag nagapasulong sa bag-ong demokratiko nga rebolusyon sang pumuluyo nga Pilipino kontra sa imperyalismo nga US kag mga lokal nga manughimulos nga sahi sang dalagku nga kumprador kag agalon nga mayduta. Ang mga kadalag-an nga ini napadaog sa pihak sang masingki nga hangkat paagi sa desaysibo kag militanteng paghimakas nga nag-agi sa mga liko apang pakadto sa bag-o kag mas mataas nga lebel sang rebolusyonaryong kamuklatan kag ikasarang nga mag-away.

Ang mga imperyalista nga US kag mga lokal nila nga papet naglunsar sang madamu nga pungsudnon kag lokalizado nga kampanya sang armadong pagpamigos kontra sa Partido, Bag-ong Hangaway sang Banwa kag pumuluyo nga Pilipino sa mapintas nga pagtinguha nga waskon ang armado nga rebolusyonaryo nga kahublagan. Pagkatapos nga magtinguha sadtong 1969-71 nga kutlon ang inaway banwa sa isa kag sang ulihi sa duha ka prenteng gerilya, ginsulsulan sang mga imperyalistang US ang rehimeng Marcos nga magpapanaog sang pasistang diktadura sa pumuluyo sa sulod sang 14 ka tuig halin 1972 tubtob pahinaon ini sang pagbato sang banwa kag ginbagsak sang isa ka pag-alsa sadtong 1986. Ginsundan ini sang serye sang mga rehimen nga naga-pakuno-kuno nga demokratiko kag napaslawan nga nagtinguha nga waskon ang demokratikong rebolusyon sang banwa paagi sa pagpaniplang kag kalakasan.

Napaslawan ang tanan nga mga pagtinguha nga waskon ang armadong rebolusyon. Labi lamang sini nga ginapabudlayan ang pumuluyo kag itulod sila nga magbato sang mas pursigido para sa ila pungsudnon kag pangkati-

lingban nga kahilwayan. Dapat naton hatagan tum-ok nga ang bag-o nga demokratikong rebolusyon paagi sa malawigan nga inaway banwa makapabilin kag magasulong sang daku kag tanan-nga-bahin sa isa ka pungsod nga madugay na nga mayor nga base sang imperyalistang paghari sang US sa bilog nga East Asia. Daku ini nga kadalag-an nga pirme nagahatag-inspirasyon sa pumuluyong Pilipino kag iban pa nga pumuluyo sang kalibutan.

Sa madinalag-on nga pagpamuno sa rebolusyong Pilipino, pirme nagatinguha ang Partido nga isimpon ang teorya sang Marxismo-Leninismo-Maoismo sa kongkretong kahimtangan sang Pilipinas kag sa kongkreto nga praktika sang rebolusyon. Seryuso sini nga ginatunan ang kasaysayan sang pumuluyo nga Pilipino kag sang pangkalibutanon nga kahublagan sang sahing mamumugon kag ginapanginpuslan ang krisis nga kahimtangan kag mga kontradiksyon sa sulod sang nagaharing sistema sa Pilipinas

kag pangkalibutanon nga sistemang kapitalista.

Sa hilikuton pangideolohiya, hugot nga naga-sunod ang Partido sa

Marxismo-Leninismo-Maoismo kag pirme ini nagatinguha nga tukuron ang diyalektiko-materyalismo nga panindugan, panan-awan kag pamaagi sa kubay sang mga kadre kag katapo sang Partido, sikwayon ang suhetibismo, sa porma man sang emperisismo kag dogmatismo. Sa hilikuton pangpulitika, gintalana sini ang linya sang bag-o nga demokratikong rebolusyon paagi sa malawigan nga inaway banwa, kag ginasiway ang Tuo kag "Wala" nga oportunismo. Sa hilikuton pangorganisasyon, ginasadag sini ang prinsipyo sang demokratiko nga sentralismo, kontra sa liberalismo kag burukratismo, kag ginpundar sini ang kaugalingon sa pungsudnon nga sakup kag madalom nga naga-ugat sa kubay sang masa nga anakbalhas nga mga mamumugon kag mangunguma.

Ginapaayo sang Partido ang pagtrabaho kag istilo sang patrabaho sini paagi sa pana-panahon kag napanahon nga mga pagsawayanay kag pagsaway-sa-kaugalingon. Apang mahimo magsige-sige kag magadaku ang mga mayor nga kasaypanan kon ang mga ini padayon nga ginauyatan kag ginapalapnag sa Partido sang mga kadre sang Partido sa mga mataas nga organo ukon pati sa Komite Sentral. Sa atubang sang amo nga kasaypanan, kinahanglan maghiwat sang dalagkuan nga kahublagan sa pagtadlong. Kaangut sini, madinalag-on nga nakalunsar ang Partido sang duha ka dungganon nga kahublagan sa pagtadlong nga kada isa amo ang kampanya sang edukasyon para magkuha sang mga leksyon sa inagihan, magtadlong sang dalagku nga kasaypanan kag italana ang mga katungdanan para isulong ang rebolusyonaryong handum.

Ginhanda sang Una nga Dungganon nga Kahublagan sang Pagtadlong ang pagtukod sang Partido halin 1965 kag nagpadayon sad-



tong mga una nga tuig sang Partido halin 1968 tubtob 1977. Ginsaway kag ginsikway sini ang natipon nga mga kasaypanan sang mga Lava kag mga rebisyunistang Lavista kag sang gangster nga hubon Taruc-Sumulong. Gin-atubang man sang Ikaduha nga Dungganon nga Kahublagan sa Pagpanadlong ang mga “Wala” kag Tuo nga oportunista nga pagsayup sadtong dekada 1980 kag temprano nga bahin sang dekada 1990. Ang mga “Wala” nga oportunista nagdulot sang malubha nga kahalitan sa Partido kag baseng masa sa laban sang dekada 1980. Pagkatapos nga hayagan nga magkambyo sa Tuo ang mga “Wala” nga oportunista sadtong ulihi nga bahin sang dekada 1980, nagtinguha ang mga Tuo nga oportunista nga lusawon ang Partido paagi sa ila eklektiko nga paghaluhalo sang mga kaisipan nga nakuha sa liberalismong burges, Gorbachovismo, Trotskyismo kag sosyal demokrasya.

Bunga sang nagalanog nga kadalag-an sang Ikaduha nga Dungganon nga Kahublagan sang Pagpanadlong nga naglawig sa masobra anom ka tuig umpisa 1992, ang Partido nagpanibag-ong-kapagsik kag labi nga napabaskog sa ideolohiya, pulitika kag organisasyon. Ang pinakamalala nga “Wala” kag Tuo nga oportunista amo ang nangin hayagan na nga mga anti-komunista kag kontra-rebolusyonaryo. Nagserbi sila nga mga espesyal nga ahente sang imperyalismo kag reaksiyon samtang nagpakasampaton sa anti-komunista nga pagpangsamad. Pila sa ila subong nagapangraket sa mga “non-governmental organization” nga ginapondohan sang mga imperyalista kag ang iban naman nagpasulod sa mga serbisyo militar kag paniktik sang kaaway bilang mga *consultant* kag eksperto sa saywar.

Napauswag sang Partido ang

pang-ideolohiya nga linya sini nga Marxismo-Leninismo-Maoismo paagi sa pagtuon sa mga sinulatan nanday Marx, Engels, Lenin, Stalin kag Mao amo man sa pagkumpronta, pagbuyagyag kag pag-sikway sa oportunismo, repormismo kag rebisyunismo kag sa nagkalain-lain nga ideya nga anti-komunista kag anti-sosyalista. Ginatun-an sini ang pinakaimportante nga halambalanon sa kasaysayan kag subong nga kahimtangan sang mga rebolusyonaryong paghimakas sang proletaryado kag pumuluyo sang Pilipinas kag kalibutan. Gina-atubang sini ang mga problema sang monopolyo kapitalismo, lokal nga pyudalismo kag burukrata kapitalismo kag ginasulong ang teorya kag praktika sang bag-o nga demokratikong rebolusyon.

Ang Partido nagsulat kag nagpagwa sang mga mayor nga desisyon, analitikal nga artikulo kag mga libro nga mataas ang teoritiko kag praktikal nga importansya. Ginbalhag ang mga ini sa Pilipino kag iban pa nga lengwahe sa Pilipinas, amo man sa Ingles kag iban pa nga lengwaheng dumuluong. Upod sang mga klasiko nga sinulatan sang mga dungganon nga komunista nga mangin-alamon kag lider, kalakip ang mga ini sa mga silabus sang mga kurso sang pagtuon nga ginatigayon sang Partido. Naghatag sang mga ubay kag bulig sa pagtudlo para ang mga mamumugon, mangunguma kag iban pa nga kulang sa pormal nga edukasyon mapasulong sa ila teoritiko kag pangpulitika nga pagtuon.

Ang basehang kurso ginalakipan sang pagtuon sa mga sandigan nga prinsipyo sang Marxismo-Leninismo-Maoismo kag sa kasaysayan, mga sandigan nga problema sang pumuluyo nga Pilipino

kag sa bag-o nga demokratikong rebolusyon bilang solusyon. Ang intermedya nga kurso nagatuyo nga analisahon ang rebolusyong Pilipino kumparar sa iban pa nga rebolusyon sa iban nga pungsod. Ang abanse nga kurso nagaunod sang pagtuon sa mga sinulatan sang mga dungganon nga komunista nga mangin-alamon kag lider sa pilosopiya, ekonomyang pangpulitika, syensya pangkatinglingban, estratehiya kag taktika kag kasaysayan sang pangkalibutanon nga kahublagan komunista.

Nagalab-ot sa pila ka pulo ka libro ang katapuan sang Partido. Madalum ini nga nakaugat sa kubay sang masang anakbalhas nga mamumugon kag mangunguma sa kabilugan nga kapuluan sang Pilipinas. Narekrut ang mga katapu sang Partido halin sa rebolusyonaryo nga kahublagan masa sang mga mamumugon, mangunguma, kababainhan, pamatan-on kag iban pa nga sektor. Ginapauswag sila paagi sa mga kurso sang pagtuon kag paghanas sa sulod kag gwa sang ila yunit, paagi sa kolektibo nga hilikuton kag indibidwal nga katungdanan kag paagi sa mga rebolusyonaryong paghimakas.

Ginasunod sang Partido ang prinsipyo sang demokratikong sentralismo kon sa diin ang sentralismo nakabase sa demokrasya kag ang demokrasya ginaubayan sang sentralismo. May pangteritoryo nga istruktura sang mga nagapamuno nga organo kag organisasyon nga nagasakup sa bilog nga pungsod sa nagkalain-lain nga lebel: mga rehiyon, prubinsya, distrito, syudad kag munisipalidad kag mga barangay. Ang mga nagapamuno nga organo may mga organisasyon nga istap nga katuwang nila sa nagkalain-lain nga tipo sang hilikuton. Ang basehang organisasyon sang Partido amo ang sanga



nga nakabase sa mga lokal nga komunidad, pabrikahan, linya sang transportasyon, eskwelahan, upis-sina kag iban pa. Ang grupo sang Partido naman ang basehang organisasyon sang Partido sa nagkalain-lain nga lebel sang isa ka organisasyong masa ukon institusyon pangkatilingban.


Gintalana sang Partido ang pangkabilugan nga linya pangpulitika sang bag-ong demokratikong rebolusyon paagi sa malawigan nga inaway banwa sa katuyuan nga ibagsak ang malakolonyal kag malapyudal nga nagaharing sistema kag tukuron ang sistema sang demokratiko nga estado sang banwa base sa alyansa sang mamumugon-mangunguma. Ginagamit sini nga armas ang rebolusyonaryo nga armadong paghimakas kag ang naghiliugyong prente. Ginauyatan sini ang linyang masa. Nagasalig ini sa masa kag nagatuon sa ila para mapukaw, maorganisa kag mapahulag sila.

Minilyon ang napukaw, naorganisa kag napahulag sang Partido ang malapad nga masa sang pumulu-yo. Ginapamunuan sini ang linibo nga hangaway sang Bag-ong Hangaway sang Banwa kag minilyon nga organisado nga mangunguma sa 120 tubtob 130 prenteng gerilya sa 70 prubinsya, masobra 800 munisipalidad kag masobra 10,000 barangay. Ginabug-os sang mga kadre sang Partido sa hangaway sang banwa kag sa mga lokalidad ang mga organo sang gahum pangpulitika kag ang mga organisasyon masa sang mga mamumugon, mangunguma, kababainhan, aktibista pangkultura kag iban pa. Bwelo nga nagahulag ang mga yunit sang hangaway sang banwa sa masobra 80% sang Pilipinas bangud indi magsobra sa 10 % sang pungsod ang masarangan sakupon sang mga tinawo sang reaksyunaryong hangaway sa

kada natalana nga panahon.

Sa kasaysayan, ang BHB ang pinakadaku nga rebolusyonaryong hangaway nga natukod sa Pilipinas. Mas daku ini sa rebolusyonaryong hangaway sang Pilipino kontra sa kolonyalismo nga Espanyol sadtong panahon 1896 tubtob 1998 kag kontra sa imperyalismo nga US halin 1899. Mas daku ini sa Hukbong Bayan Laban sa Hapon ukon sa Hukbong Mapagpalaya ng Bayan. Sa kaugalingon sini, mas mabaskog ang BHB subong sangsa sadtong dekada 1980. Ang rurok sang kusog sini sadtong dekada nga nasambit amo nga 6,100 lamang, nga wala sang anuman nga maathag nga pagkwenta sa mga pusil nga nadula sa Mindanao bunga sang Kampanyang Ahos.

Sa kaumhan, ginatingub sang Partido ang rebolusyonaryo nga armadong paghimakas, reporma sa duta kag pagtukod sang base para isulong ang bag-ong demokratiko nga rebolusyon. Rebolusyonaryo nga armadong paghimakas ang pangunahon nga porma sang paghimakas. Ginawasak sini ang armado nga gahum sang dalagku nga kumprador kag agalon nga mayduta kag ginatukod ang hangaway sang banwa sa kaumhan tubtub nga makaangkon ini sang ikasarang nga agawon ang gahum pangpulitika sa kasyudaran. Bunga sang Ikaduha nga Dungganon nga Kahublagan sa Pagpanadlong, nangin mabaskog ang BHB sa pulitika




kag militar paagi sa paglunsar sang maikit kag lapnagon nga pagpakig-away gerilya base sa nagapalapad kag nagapadalam nga baseng masa.

Paagi lamang sa armado nga gahum napatuman sang Partido kag pumuluyo ang reporma sa duta bilang pangunahon nga kaundan sang demokratikong rebolusyon. Nagaunod ini sang minimum nga programa sang pagpanubo sang arkila sa duta, pagdula sang usura, pagpataas sang suhol sang mamumugon sa uma, pagpaayo sang presyo sang mga produkto sang mangunguma kag pagpataas sang produksyon sa agrikultura kag iban pa nga hilikuton sa pangabuhian. Base sa ini nga programa, mahimo makadto sa maksimum nga lebel sang kumpiskasyon sang duta kag libre nga pagpanagtag sang duta. Sa pagsulong sang armadong paghimakas kag rebolusyon nga agraryo, mangin nga possible nga magsulong halin sa lebel sang mga prenteng gerilya pakadto sa lebel sang mga istable nga baseng purok paagi sa pagpabaskog sa mga organo sang gahum pangpulitika, mga organisasyong masa, mga yunit milisya kag mga yunit sa pagdepensasa-kaugalingon.

Napundar sang Partido ang naghiliugyon nga prente bilang importante nga armas sang bag-ong demokratikong rebolusyon. Ang armas nga ini nagaunod sang pila ka tipo sang alyansa. Ang pinakaimportante sa mga ini ang sandigang alyansa sang mga mamumugon kag mangunguma. Ini ang alyansa sang sahing ma-

mumugon bilang nagapamuno nga sahi kag sang sahing mangunguma bilang pangunahon nga pwersa sang rebolusyon nga Pilipino. Bilang abanse nga destakamento sang sahi nga mamumugon, ginasunod sang Partido ang antipyudal nga li-nya nga makasahi sa pagpakig-alyansa sa masa nga mangunguma: nagasalig pangunahon sa mga imol nga mangunguma kag mamumugon sa uma, habigon ang mga nahanu-nga nga mangu-nguma, nyutralisa-hon ang manggaranon nga mang-unguma kag panginpuslan ang pag- katunga-tunga sa kubay sang mga agalon nga mayduta para ihamulag kag waskon ang gahum sang pinaka- daku kag pinakadespotiko nga aga- lon nga mayduta.

Paagi lamang sa epektibo nga sandigan nga alyansa sang mga mamumugon kag mangunguma pa- ra sa armadong paghimakas ma- ngin epektibo ang iban pa nga tipo sang alyansa sa nagahiliugyong prente. Ginatumod naton ang progresibo nga alyansa sang mga sandigan nga rebolusyonaryo nga pwersa sang masa nga anakbal- has kag petiburgesyang syu- dad, ang patriyotiko nga alyansa sang mga progre- sibong pwersa kag naha- nunga nga burgesya kag ang malapad nga nagahiliugyon nga prente sang mga patriyoti- ko nga pwersa kag iban pa nga



reaksyunaryong pwersa para batu- an ang kaaway, ang pinakamalala nga reaksiunaryo nga pwersa kag pinakasunod-sunuran sa imperyal- ismo.

Ginagamit sang Partido ang polisiya sa nagahiliugyong prente kag ang nagkalain-lain nga porma sang alyansa para dugangan ang kusog sang mga sandigan nga re- bolusyonaryong pwersa kag para malab-ot, mapukaw kag mapahu- lag ang minilyon nga pumuluyo sa lain-lain nga porma kag sa mala- pad nga kubay sang mga isyu. Upod ang mga kaalyado nga orga- nisasyon, gintukod sang Partido ang National Democratic Front of the Philippines bilang balayon sang nagahiliugyong prente sang mga sandigan nga rebolusyo-nary- ong pwersa. Ang NDFP bukas sa pangsulod nga pagpalapad pareho sang pagsulod sa pormal ukon in- di pormal nga malapad nga pagpa- kighiliugyong prente sa mga reak- syunaryong pwersa kontra sa pina- kamasupog nga reaksiunaryong pwersa sa isa ka natalana nga pa- nahon.

Sa mga ligal nga paghimakas masa kontra sa imperyalismo nga US kag pinakamasupog nga lokal nga reaksiunaryo, pirme nagapana- wagan ang Partido sa malapad nga masa sang pumuluyo kag sa mga pwersa nga patriyotiko kag progre- sibo nga maghiliusa kag maghulag sang malig-on kag militante. Na- kahimo ang Partido sang nagakaigo nga mga amot sa pagpukaw kag pagpahulag sang pumuluyo sa da- lagku nga aksyon protesta nga naglab-ot sa pagpatalsik kanday Marcos kag Estrada. Nahimo nga paslawon ang mga padihot nga bag-uhon ang konstitusyon 1987 para paserbihon sa mga katu- yuan nga maki-imperyalista kag reaksiunaryo samtang pa- dayon ang pagbuyagyag kag pagkundenar sa maka-imper-

yalista kag reaksiunaryo nga mga polisiya sang nagaharing hubon.

Paagi sa kaugalingon nga kusog lamang, ang ligal nga demokratiko nga kahublagan masa mahimo ma- kapatalsik sang isa ka partikular nga reaksiunaryong rehimen apang indi makapabagsak sa bilog nga nagaharing sistema. Sadto pa gi- nakilala sang Partido nga ang ligal nga demokratiko nga kahublagang masa pwede nga magpahina sa na- gahari nga sistema, magbaskog kag magpalig-on sa pagka matarung sang rebolusyonaryo nga handum sang pumuluyo. Apang ang amo nga kahublagan bulnerable sa ma- pintas nga atake sang mga masu- pog nga reaksiunaryo. Kaangut si- ni, padayon nga ginaganyat sang Partido ang mga patriyotiko kag progresibong aktibista nga ligal nga magpartisipar sa rebolusyo- naryo nga armadong paghimakas kon ginatarget sila sang ekstrahudisyal nga pagpatay, pagdukot, tortyur kag pagbilanggo sang reaksiuna- ryong estado.

Nagapanindugan ang Partido para sa demokratiko nga kinamata- rung kag kaayuhan sang mga Pili- pino sa luwas sang pungsod kag nagapanawagan sang ila suporta sa rebolusyonaryong paghimakas sang pumuluyo nga Pilipino para sa pungsodnon nga kahlilwayan kag demokrasya. Sa pila ka pulo nga pungsod, ginaganyat sini ang mga Pilipino nga imigrante, permanente nga residente kag mga kontraktwal nga mamumugon nga magtukod sang ila mga organisasyon kag ipa- kig-away ang ila mga kinamatarung kag interes.

Nagaangkon ang Partido sang mataas nga tindog sa pangkalibu- tanon nga kahublagan komunista amo man sa malapad nga kahub- lagan anti-imperyalista. Bunga ini sang daku nga kadalag-an sang Partido kag pumuluyong Pilipino sa pagsulong sang bag-o nga demok-

ratikong rebolusyon kontra sa imperyalismo nga US kag mga lokal nga reaksyonaryo, amo man sang rebolusyonaryo nga panindugan sang Partido sa mga halambalanon internasyunal. Ginatun-an sang mga partido nga komunista kag mamumugon ang mga publikasyon sang aton Partido kag handum ni-

la nga magbayluhanay sang ideya kag inagihan sa aton Partido. Nakatukod kag nakapauswag ang aton Partido sang mainabyanon nga relasyon sa iban nga Partido paagi sa bilateral nga mga pulong kag multilateral nga mga kumpe-rensya. Sa sini nagsulod ini sa mga kasugtanan sa praktikal nga

pagbuligay sa diwa sang proletaryo nga internasyunalismo. Sa malapad man nga kubay sang mga pwersa nga anti-imperyalista kag demokratiko, sa diwa sang anti-imperyalista nga paghiliusa, nagtukod man sang relasyon ang Partido kag mga organisasyong masa nga ginpamunuan sang Partido.

IV. Mga plano sa kalitatibo nga lukso sang armadong rebolusyon

Ginakabig sang Partido nga napakaimportante nga halambalanon kon pano dalhon ang bag-ong demokratikong rebolusyon sa bag-o kag mas mataas nga lebel sang pag-uswag ukon sa kalitatibo nga paglukso, base sa manggaranon nga natipon nga rebolusyonaryong inagihan, kusog kag dalagku nga kadalag-an sang Partido, BHB, NDFP kag sang malapad nga masa sang pumuluyo nga Pilipino, kag base sa nagapalubha nga krisis kag depresyon sang resksyonaryo nga nagaharing sistema sa Pilipinas kag sang pangkalibutanon nga sistema nga kapitalista.

Nagakadapat para sa Partido nga iplastar ang plano para padasigon ang pagsulong sang hilikuton pang-ideolohiya, pangpulitika kag pang-organisasyon, padakuon ang mga suhetibo nga pwersa sang rebolusyon kag hingalitan ang nagapalala nga krisis sang imperyalismo kag mga lokal nga reaksyonaryo, para sundon ang katuyuan nga ibagsak ang garuk nga nagaharing sistema kag tukuron ang demokratiko nga republika sang pumuluyo.

Mahimo kita magplastar sang lima ka tuig nga sentral nga plano sang paghulag. Dapat ini nga magdala sang maathag nga katuyuan nga maangkon tuig-tuig kaangot sang kumulatibo nga pagdaku amo man sang pleksibilidad kag ikasarang nga magsanto para mag-angkon sang mas maayo nga resulta. Dapat ini nga ibase sa subong nga lebel sang kusog, rekord kag mga plano sang manubo nga mga organo kag organisasyon sang Partido, sang dugang nga pagpanayasat para kumpirmahon ang subong nga kusog kag tantyahan ang potensyal nga pagda-

ku, kag sa desisyon nga athagon ang mga katungdanan kag pamaagi sang pagpatuman sa mga katungdanan kag paghimo sang mga kinahanglanon nga tsek-ap, paloap kag pag-santo.

Ang dapat mangibabaw nga katuyuan sang plano amo nga pasan-yugon ang kusog sang mga rebolusyonaryong pwersa kag sundon ang handum nga waskon ang nagaharing sistema kag kambyuhan ini sang demokratiko nga estado sang pumuluyo. Dapat sakupon sang plano ang masunod nga mga punto:

1. Hatagan sang edukasyon kag paghanas ang mga kadre kag katapo sang Partido sa linya pang-ideolohiya sang Marxismo-Leninismo-Maoismo kag sa pangkabilugan nga linya pangpulitika sang bag-o nga demokratikong rebolusyon.

Dapat hatagan sang Partido sang edukasyon kag paghanas ang madamu nga kadre kag katapu sang Partido sa teorya kag praktika sang Marxismo-Leninismo-Maoismo kag sa pangkabilugan nga linya sang bag-ong demokratikong rebolusyon

paagi sa malawigan nga inaway banwa para magserbi nga salsalon nga bag-as kag nagapamuno nga pwersa sang rebolusyonaryo nga kahublagang masa. Kinahanglan naton sang pila ka pulo ka libo nga kadre sang Partido kag ginatos ka libo kag sa ulihi minilyon nga katapu sang Partido para ipatuman ang dalagku nga mga hilikuton sang rebolusyon kag maghimo sang kalitatibo nga lukso sa rebolusyonaryong kahublagan.

Ang mga sanga kag grupo sang Partido dapat mag-agi sa basehan nga kurso pangpulitika kag basehan nga kurso sang Partido para maagap nga mahatagan sang ihibalo kag kahanasan ang madamu nga kandidato nga katapo sang Partido para mangin lubos nga katapo kag para man mapapreska kag makonsolida sang mga lubos nga katapo ang ila kinalam. Ang mga mas mataas naman nga organo sang Partido dapat mag-agi sa intermedya kag abanse nga kurso sang Partido kag maghatag pagtamod sa edukasyon kag paghanas sang mga instruktur sa tanan nga kurso sang pagtuon.

Dapat planuhan sang mga nangtungdan nga organo sang Partido kon paano makuha kag matapos sang mga daan kag bag-o nga kandidato nga katapu ang basehan nga kurso sang Partido nga wala sang anuman nga sablag. Ang mga mas manubo ang ikasarang magbasa kag magintindi sang mga orihinal nga teksto dapat hatagan sang ginpasimple nga mga materyales sa pagtuon kag mga interesante nga bulig biswal. Ang

mga may labaw nga ikasarang dapat maghatag sang maki-kaupod nga bulig sa iban sa proseso sang pagtuon sa ubay sang instruktur.

2. Padasigon ang pagrekrut sang mga kandidato nga katapu halin sa rebolusyonaryong kahublagan kag makahas nga palaparon ang Partido.

Dapat magrekrut ang Partido sang mga kandidato nga katapu halin sa kubay sang pinakaaktibo kag pinakaabante nga mga elemento sang kahublagan masa. Ang nagaluntad nga pagsulundan naton amo nga palaparon ang Partido nga wala ginapabay-an nga makasulod ni isa ka ahente sang kaaway. Ang kahublagang masa amo ang masaligan nga pamaagi para matumod ang tampad nga elemento nga nagabaton sa Sandigan nga Pagsulundan kag Programa sang Partido kag determinado kag militante nga nagasunod sa pangkabilugan nga linya sang paghimakas sang banwa para sa pungsudnon nga paghilway kag demokrasya. Pwede man kita nga magrekrut sang mga elemento sa mga reaksyunaryong institusyon kag organisasyon nga nagabaton sa Sandigan nga Pagsulundan kag Programa sang Partido apang nagakadapat maghalong para epektibo makatungod sang ispesyal nga mga hilikuton para sa Partido.

Responsibilidad sang mga nangtungdan nga organo sang Partido nga himuon nga mga lubos nga katapu ang mga kandidato nga katapu sa sulod sang panahon nga gintalana sang Sandigan nga Pagsulundan sang Partido, sandig sa mga makasahi nga konsiderasyon. Gilayon makatapos sang pangkabilugan kag ispesyal nga mga kursong masa, dapat nga makuha sang mga abanse nga elemento sang kahublagan masa ang pangmasa kag basehan nga kurso sang Partido bilang kandidato nga katapu. Para mangin lubos nga katapu, ang kandidato nga katapu da-

pat makatapos sang basehan nga kurso sang Partido, dapat aktibo sa isa ka sanga ukon grupo sang Partido kag dapat magsunod sa mga gintalana nga hilikuton. Ang amo nga mga hilikuton sa panahon sang kandidatura makabig nga hilikuton nga pagtilaw.

Nahibal-an sang Partido nga ang pagdaku sang organisasyon sini amo nga nalimitahan sa pagpabaya sa pagrekrut sang mga kandidato nga katapu. Nalimitahan man ini bisan ano man kadasig ang pagrekruta kon may pagpabaya sa paghatag sang basehan nga kurso sang Partido kag indi paghatag sang pagtamod sa natalana nga panahon sang pagkakanidato nga katapu. Ginapahanumdom ang tanan nga kadre kag katapu sang Partido nga mangin inspirado ang mga aktibistang masa kon sila mangin kandidato nga katapu kag labi pa nga mangin inspirado ang mga kandidatu nga katapu nga dugang pa nga magtinguha kag mas maukod pa nga ipakig-away ang rebolusyonaryong handom kon sila mangin lubos nga katapu kag ang Partido makaangkon sang dugang pa nga ikasarang mag-angkon sang mas dalagku nga kadalag-an kon kumulatibo nga magdamu ang mga kadre kag katapu sang Partido.

3. Pasanyugon ang mga kampanya para pukawon, organisahon kag pahulagon ang pumuluyo sandig sa pangkabilugan nga linya sang bag-o nga demokratikong rebolusyon.

Dapat pirme kita magtuon sa masa paagi sa pangkatilingban nga pagpanayasat sa ila kahimtangan nga pigos kag ginahimuslan kag sa ila mga kongkreto nga kinahanglanon kag kagustuhan. Sa sini, matun-an naton kon paano himuon ang mga kampanyang masa para pukawon, organisahon kag pahulagon ang pumuluyo. Dapat kita magsalig kag magsandig sa ikasarang sang pumuluyo nga maghulag sang epektibo bahin sa mga halambalanon ba-

hin sa ila nga mga kinamatarung kag interes, kag magsunod sa direksyon pakadto sa pag-agum sang gahum kag benepisyo sandig sa pangkabilugan nga linya sang bag-o nga demokratikong rebolusyon.

Dapat siguruhon sang Partido nga makuha kag maintindihan sang mga lider kag katapu sang mga organisasyon masa ang pangkabilugan nga kursong masa sa katilingban kag rebolusyon nga Pilipino kag ang katumbas nga sektoral nga kursong masa. Dala ang ini nga nagadaku nga kwerpo sang mga muklat nga aktibista sa mga organisasyong masa, mai-paabot sang Partido ang rebolusyonaryong mensahe sa nagapadaku nga numero sang pumuluyo. Ang katungdanan nga pukawon ang pumuluyo dapat tumanon sang maayo paagi sa mga aksyong masa kag mga publikasyon kag lain-lain nga porma sang ahitasyon kag propaganda.

Dapat sige-sige nga palaparon kag palig-unon ang mga organisasyong masa sang mga mamumugon, mangunguma, kabainhan, pamatanon, propesyunal, aktibista pangkultura kag iban pa nga pormasyon nga sektoral ukon nakabase sa isyu. Kada organisasyong masa dapat may ara nga maathag nga plano sa kumulatibo nga pagpalapad sang katapuan kag pagkonsolida diri paagi sa edukasyon pangpulitika, paghatag sang hilikuton kag pagsiguro sa mga resulta. Ang mga mobilisyon kag kampanyang masa dapat magserbi nga pamaagi para gamiton ang subong nga kusog, sa amo man para pasanyugon ang kusog paagi sa pagganyat sang mas madamo nga tawo para mangin katapu.

4. Paigtingon ang rebolusyonaryo nga armadong paghimakas kag lab-uton ang mga target para bug-uson ang mga kadalag-an sa pulitika kag militar.

Sa absoluto nga pagpamuno sang Partido, dapat padayon nga isulong sang BHB ang estratehikong

lina sang malawigan nga inaway banwa. Dapat ini magpalig-on sa kaumhan tubtub malab-ot sini ang ikasarang nga agawon ang kasyudaran sa pungsudnon nga sakup. Ang rebolusyonaryo nga armadong paghimakas lakip ang rebolusyon nga agraryo kag ang pagtukod sang baseng masa.

Dapat magsulong ang BHB halin sa halintang sang estratehikong depensiba pakadto sa estratehikong pagkapatas kag sa katapusan sa estratehikong opensiba. Sa kada estratehiko nga halintang, dapat ini maglunsar sang mga taktikal nga opensiba para bag-uhon ang timbangan sang kusog paagi sa pagtuga sang nagadamo nga kapaslawan sa kaaway kag paglab-ot sang nagapadaku nga armadong kusog paagi sa dugang nga inagihan sa inaway, armas kag ikasarang teknikal.

Sa subong, nagalunsar ang BHB sang maikit kag lapnagon nga pagpakig-away gerilya base sa nagapalapad kag nagapadalum nga baseng masa. Dapat sini paigtingon ang inaway gerilya para magpapas sang mga yunit sang kaaway, magsamad sang mga pasilidad sang kaaway, harangan ang mga linya sang suplay sang kaaway, pwersahon ang kaaway nga magtuon sa paggwardya kag mangin depensibo. Dapat man sini bungkagon ang mga operasyon sang pagpang-agaw sang duta sang mga dumuluong kag lokal nga agrokorporasyon, kumpanya sang pagmina, kumpanya sang pagtroso sang pang-eksport, kumpanya sang *real estate* (negosyo sa lupa kag biding) kag mga kapareho nga empresa nga nagapagamay sa duta para sa pagpanguma kag para sa reporma sa duta kag makawasak sa kapalibutan.

Dapat atubangon sang BHB ang wala masilutan nga matag-as nga burukrata kag upisyal militar nga nagtraidor sa banwa, nagapandambong kag nagalapas sa tawhanong kinamatarung. Ang mga ara sa likod

sang mabug-at nga krimen mahimo ipatawag sa imbestigasyon kag arestuhon kag kon armado kag delikado ukon protektado sang mga armado nga tinawo mahimo sugataon sang manug-aresto nga yunit sang BHB. Ang pagretiro sa katungdanan sa reaksyunaryong gubyrno wala nagakahulugan nga ang mga suspek indi na pagpaatubangon sa ila salabton kriminal, pagaarestuhon ukon engkwentruhon. Dapat tratuhon nga kahimbon sa krimen ang malapit nila nga pamilya kag abyan nga nagabeneplisyo sa krimen ukon bunga sini. Dapat pamatukan ang pagtukod sang dinastiya kag kroniismo.

5. Isulong ang reporma sa duta pakadto sa bag-o kag mas mataas nga lebel tubtub sa maksimum nga lebel.

Dapat isulong sang Partido ang reporma sa duta pakadto sa bag-o kag mas mataas nga lebel tubtub sa maksimum nga programa sang reporma sa duta, sa diin man masarangan. Mahimo imentinar ang minimum nga programa sang reporma sa duta sa diin man ini mapuslanon pa sa mga nagauma kag wala pa ang mga rekisito sang maksimum nga reporma sa duta pareho sang nagakai-go nga kusog kag kahandaan sang Partido, hangaway sang banwa kag asosasyon sang mangunguma.

Sa pagpursiger nga malab-ot ang maksimum nga reporma sa duta, ang pangunahon nga bunal dapat isentro sa dalagku nga despotiko nga agalon nga mayduta kag mga korporasyon nga nagapang-agaw sang duta nga may mga armado nga tinawo ukon nagagamit sa reaksyunaryong militar kag pulisya para piguson ang masa nga mangunguma kag nagakontra sa rebolusyonaryo nga kahublagan. Dapat gamiton sang BHB ang mga taktika sa pagbungkag kag pagbale-wala sa mga operasyon sang mga dalok-sa-duta nga elemento nga ini kag sa sini mapwersa sila nga maghalin sa duta. Kadu-

ngan sini, dapat organisahon ang mga mangunguma nga wala sang duta para okupahon ang duta.

Kon nagapamilit ang mga despotiko nga agalon nga mayduta kag mga manug-agaw sang duta nga uyatan ang duta paagi sa paggamit sang reaksyunaryong militar kag pulisya kag mga pribado nga armadong gwardya, dapat sila himuon nga bubon sang armas sang BHB paagi sa paliwat-liwat nga pagsalakay sa mga nahamulag nga gwardyahan ukon pag-ambus sa mga gwardya sa dalan. Mas daku ang duta, mas mabudlay bantayan. Mangin masyado ka gastos sa daku nga agalon nga mayduta ukon mga korporasyon nga piliton nga uyatan ang duta batuk sa desidido nga pagbato sang pumuluoy kag hangaway sang banwa.

6. Pauswagon ang mga prente nga gerilya pakadto sa mangin relatibo malig-on nga baseng purok.

Dapat padamuon ang mga prenteng gerilya pakadto sa numero nga 168. Nagakahulugan ini sang pagluntad sang isa ka prenteng gerilya sa kada distrito nga kongresyunal sa tanan nga prubinsya sandig sa linya sang maikit kag lapnagon nga pagpakig-away nga gerilya base sa nagapalapad kag nagapadalum nga baseng masa. Mahimo magpakat kag madiriher ang pinakamalapit nga kumand sang prente nga gerilya sang mga yunit sang armadong partisano sa syudad nga may ispesipiko nga katungdanan sa mga pinaka-urbanisado nga distrito nga kongresyunal sa pagpakigkoordinata sa natungdan nga organo sang Partido sa distritong urban.

Ang pag-angkon sang pat-ud nga target sa pagpadaku sang numero sang mga prenteng gerilya nagaganayat sa aton nga pamensaron ang madason nga halintang sa pagpauswag sang rebolusyonaryong teritoryo. May kamatuoran kag rasonable nga handaan kag tinguhaon ang pagpatuhaw sang mga relatibo istable nga baseng purok halin sa pagpadamu,

pagsimpon, pagtalambi ukon pagpalapad sang subong nga mga prenteng gerilya sa idalum sang isa ka kumand sa baseng purok, nga may ikasarang maglunsar sang mga kumpanya- kadaku nga taktikal nga opensiba sa sakup sang prubinsya ukon pila ka prubinsya, kon nakabase sa erya sa dulunan sang mga probinsya.

Para matukod ang relatibo malig-on nga baseng purok, dapat pamunuan sang Partido ang BHB sa pagtapna kag pagpalayas sa mga nagapamigos kag nagapanghimulos kag pagbungkag sa mga reaksiyunaryo nga organo sang gahum pangpulitika sa malapad nga erya. Dapat abuton sang Partido, hangaway sang banwa kag mga organisasyong masa ang isa ka bag-o kag mas mataas nga lebel sang pag-uswag. Bangud ang pangsulod nga siguridad ginaatipan sang mga milisya sang banwa kag mga yunit sa pagdependensa-kaugalingon sang mga organisasyon masa, ang BHB makapadamu kag makapaigting sang mga taktikal nga opensiba kag makalunsar sang mga inaway nga malipot lang ang panahon sang pahuway.

7. Tukuron ang naglain-lain nga alyansa sandig sa pagsulundan sa nagahiliugyong prente para malabot ang nagapadaku nga numero sang pumuluyo.

Dapat naton nga tukuron ang nagkalain-lain nga alyansa sandig sa pagsulundan sa nagahiliugyong prente para mapukaw, maorganisa kag mapahulag ang nagapadaku nga numero sang pumuluyo. Ang pinakaimportante sa mga alyansa nga ini amo ang sandigan nga alyansa sang mamumugon-mangunguma bangud ini ang pinakapundasyon sang demokratiko nga rebolusyon sang pumuluyo.

Ginahugpong sini ang sahi nga mamumugon bilang rebolusyonaryo nga nagapamuno nga sahi kag ang sahi nga mangunguma bilang pinakadaku nga sahi kag pangunahon

nga pwersa sang rebolusyon. Ang demokratiko nga gubyrno sang pumuluyo nakabase sa alyansa sang mamumugon-mangunguma subong kag sa palaabuton.

Dapat naton padayon nga pauswagon ang progresibo nga alyansa sang masa nga anakbalhas nga mga mamumugon kag mangunguma sa petiburgesya sa syudad. Sila tanan nga sandigan nga pwersa sang rebolusyon. Sa subong, ang ila alyansa amo ang pinakamaayo nga representante sa sekreto nga rebolusyonaryo nga kahublagan sang NDFP. Dapat man naton padayon nga pauswagon ang patriyotiko nga alyansa sang mga sandigan nga rebolusyonaryong pwersa sa nahanunga nga burgesya paagi sa pagsulong sang anti-imperyalismo kag pagsakdag sang kauswagan industriyal sang pungsod.

Dugang pa, dapat naton pauswagon ang malapad nga nagahiliugyong nga prente nga nagaunod sang pagpakig-alyansa sang mga patriyotiko kag progresibong pwersa sa pila ka seksyon sang mga reaksiyunaryong sahi batuk sa kaaway, ang pinakamalala nga reaksiyunaryong hubon kag pinakasunud-sunuran sa imperyalismo. Ang ini nga tipo sang alyansa amo nga temporaryo kag mahuyang bangud reaksiyunaryo ang kinaiya sang mga kaalyado kag mahimo talikdan kag luiban nila ang alyansa. Kaangot sini, dapat pirme kita mangin mabinantayon, magmentinar sang kahilwayan kag inisyatiba, magpakasampaton sa pagpakig-isa kag pagpakigbanggi kag mag-agum sang rebolusyonaryong kusog samtang nagatindog pa ang alyansa.

8. Sakdagon ang proletaryo nga internasyonalismo kag ang malapad nga paghiliusa anti-imperyalista.

Dapat sakdagon sang Partido ang proletaryo nga internasyunalismo kag magpabilin nga aktibo sa internasyonal nga kahublagang komu-

nista. Ang pinakamaayo nga pamaagi nga makaamot kita sa pagsulong sang pangkalibutanon nga rebolusyong proletaryo amo ang dugang pa nga pagsulong kag paglabot sang mas madamu pa nga kadalagan sa subong nga bag-o nga demokratikong rebolusyon sa Pilipinas, kag sa pagkunderar kag pagbato sa imperyalismo, rebisyonismo kag tanan nga reaksiyon. Dapat kita magbayluhanay sang inagihan kag ideya sa iban nga Partido kag makalabot sa mga posible kag kinahanglanon nga porma sang praktikal nga pagbinuligay.

Dapat sakdagon sang Partido ang malapad nga paghiliusa anti-imperyalista sang pumuluyo sang kalibutan. Upod sang NDFP, madugay na ini nga aktibo sa pagsulong sang paghiliusa anti-imperyalista paagi sa pagpakig-angot kag pagpakigbuligay sa mga kahublagan sa pungsudnon nga kahilwayan kag lain-lain nga organisasyon kag institusyon sang pumuluyo sa iban nga pungsod. Nakabuyok sa aton ang mangin aktibo sa mga organisasyong masa sang pumuluyo nga Pilipino sa sulod kag gwa sang pungsod sa pag-away sa imperyalista nga pagpangdambong kag gera nga ginaduso sang US sa idalum sang mga islogan nga pareho sang “globalisasyon nga neoliberal” kag “gera kontra sa terorismo.”

Dapat labi pa nga pauswagon sang Partido ang angot sini sa mga Partido, organisasyon kag institusyon sang pumuluyo sa iban nga pungsod indi lang para makatipon sang suport para sa pumuluyong Pilipino sa ila paghimakas para sa pungsodnon nga kahilwayan kag demokrasya kundi para man maamot ang masarangan sini kag magpartisipar sa mga pagtinguha sang tanan nga pumuluyo para labuton ang dugang nga kahilwayan, demokrasya, katarungan pangkatilingban, kauswagan kag pangkalibutanon nga kalinungan. AB

Mga dugang nga pagpaathag:

1 *Great Depression:* “Daku nga Depresyon,” pangkalibutanon nga krisis sang kapitalismo nga nag-umpisa sa US sadtong 1929 kag naglawig tubtub kabilugan nga dekada 1930 kag una nga bahin sang dekada 1940 sa iban nga mga pungsod. Ginakinaiyahan ini sang malawigan nga pagkabakante sang mga ulubrahan kag malaparan nga disempleyo kag kabudlayan. Gintinguhaan ini nga lubaron sang New Deal ni Pres. Delano Roosevelt paagi sa mga programa nga pangganyat sang produksyon kag pagkonsumo. Apang sa katapusan, ang pagsulod sa ikaduha nga inaway pangkalibutanon ang aktwal nga nagtapos sini.

2 Bukal nga *high-tech*: Ginatumod sini ispekulasyon sa sapi sang mga kumpanya sa patag sang teknolohiya kag nakabase sa *internet* nga artipisyal nga nagpadaku sa balor sang mga sapi sini sadtong 1995-2001.

3 *Mortgage meltdown*: Malaparan nga pagkalusaw kag pagbagsak sang balor sang mga papeles sang prenda sa pabalay ukon mortgage sang minilyon nga Amerikano bangud indi na mabayaran ang mga utang.

4 *Mortgage-backed securities, collateralized debt obligations, structured investment vehicles, credit default swaps*: ang mga ini nagkala-lain nga porma sang mga pangpinansya nga instrumento nga sugpon-sugpon nga ginabaligya sang daku nga bangko kag institusyon nga pangpinansya sa isa kag isa, sa gubyrno kag iban pa. Ginagamit nga pangganyat ang nagkalain-lain nga bag-o nga pagkay-o, pagkumbinasyon, pagbansag kag iban pa nga pag-ilis para makaganyat sang mga mabaligyaan sang mga ini.

5 *Stagflation*: Malawig nga panahon nga nagpundo sang ekonomya kadungan ang padayon pa gihapon nga pagtimbuok sang mga presyo. Nangin kinaandan nga kinaiya na ini sa mga pangunahon nga kapitalistang pungsod kag pangkalibutanon nga sistemang kapitalista halin sadtong ruok sang gera sang

US sa Vietnam. Antes sini kinaandan nga bagsak ang mga presyo sa merkado kada maghina ukon nagaagi sa resesyon ang kapitalistang ekonomya.

6 *Financialization*: Ginatumod sini ang paglab-ot sang konsentrasyon sang kapital sa labi pa nga paghabok kag dominasyon sang pangpinansya nga kapital sa bilog nga kapitalistang ekonomya sang US, kag ang ginbunga sini nga paggamay sang bahin nga aktwal nga nagamit sa produksyon.

7 *Greenhouse gas*: Mga gas sa atmospera nga nagapugong sa paggwa sang init kag nagabungang pagtaas sang temperatura sa bilog nga kalibutan.

8 Merkado nga “*last resort*”: Ginatumod sini ang pati ang pinakadaku nga tagapag-angkat sang US kag, sa pihak sang mga proteksyunista nga pagsulundan sang US, ang pagdaku sang ginabakal sini halin sa iban nga pungsod (China, South Korea, Taiwan kag iban pa) sa mga nakaligad nga dekada. Naghatag ini sang sala nga paglaum nga maisalbar pa sini ang pangkalibutanon nga merkado kag sa sini ang mga ekonomya nga nakadepende sa pag-eksport sang mga balaklunon.

9 *Unipolar/multipolar*: Nagaluntad ang kalibutan “unipolar” halin sang nagbagsak ang Soviet Union kag nabilin nga nagaisahanon nga dominante ang gahum sang US. Sa pagduso sang “multipolar” sa kalibutan, gusto sang iban nga pungsod nga tapuson na ang nagaisahanon nga dominasyon sang US kag magangkon sang mas dalagku nga tingog sa mga halambalanon pangkalibutanon.

10 *Missile shield*: Sistema sang depensa militar sang US kon sa diin ang mga paluparon nga *missile* sang mga kaaway sini nga magtarget sa ila nga pungsod nga amo ang palukpon samtang ara sa gwa sang atmospera sang kalibutan. Sa pagtan-aw sang Russia kag iban pa nga imperyalistang karibal sang US, pamahog ini sa ila nga siguridad kag interes.



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Especyal nga Isyu
Disyembre 26, 2008
www.philippinerevolution.org

Pabakuron ang Partido kag pasanyugon ang paghimakas sang pumuluyo sa pagsaulog sang ika-40 anibersaryo sang pagkatukod

Mensahe sang Komite Sentral
Partido Komunista sang Pilipinas

Bug-os ang kalipay nga ginasaulog naton subong nga adlaw ang ika-40 anibersaryo sang pagkatukod sang Partido Komunista sang Pilipinas (PKP) bilang abante nga destakamento sang sahing mamumugon nga Pilipino sa teoritikong ubay sang Marxismo-Leninismo-Maoismo. Kwarenta ka tuig na ang nakaligad, gintukod naton liwat sa bag-ong pundasyon ang sad-to anay nga Communist Party of Philippine Islands (CPPI).

Sa masadyahon nga okasyon nga ini, kami sa Komite Sentral sang PKP nagasaludo sa tanan nga kaupod sa tanan nga organo, yunit kag patag sang hilikuton sang Partido, tanan nga Pulang kumander kag hangaway sang Bag-ong Hangaway sang Banwa, tanan nga magkaalyado nga pwera sa National Democratic Front of the Philippines, tanan nga lider kag upisyal sang mga lokal nga organo sang demokratikong gubyrno sang pumuluyo, tanan nga aktibista sa kahublagang masa kag sa malapad nga masa sang pumuluyong Pilipino.

Ginatamyaw namon ang tanan nga kadre kag katapu sang Partido sa tanan nga natipon kag bag-o nga mga kadalag-an sa hilikuton pang-ideolohiya, pangpulitika kag pang-organisasyon kag ang tanan nga rebolusyonaryong pwera kag pumuluyo sa mga dungganon nga

kadalag-an sa pagpasulong sang bag-o nga demokratikong rebolusyon paagi sa malawigan nga inaway banwa kag pagpakighiliugyong prente batuk sa dumuluong nga monopolyo kapitalismo, lokal nga pyudalismo kag burukrata kapitalismo.

Indi magsulong ang rebolusyonaryong handum sang pumuluyo kon wala ang prinsipyang pangindugan, militansya kag pasensya sang

bug-os nga Partido sa rebolusyonaryong paghimakas. Naangkong naton ang mga kadalag-an paagi sa pagtinguha, matutom nga paghimakas kag mga sakripisyo. Dapat naton nga ihatag ang pinakamataas nga pasidungog sa aton mga rebolusyonaryong martir kag baganihan, lakip ang yadtong nagkalamatay sa patag-awayan kag mga naghalad sang ila kabuhi sa lain-lain nga rebolusyonaryong hilikuton sa guwa sang patag-awayan.

Kada tuig, naga-pabugal ang rehimeng US-Arroyo nga lubos sini nga pagadugmukon, estratehikong lutuson ukon pia-

